

永綏廳志

卷

三十九  
廿八

天

地

人

和

平

安

永綏廳志卷之二十八

藝文門

奏嶺屯防類上凡例 四條

- 一此為原文第五卷今以次於二十九
- 一此文凡例皆見於上卷二十八故不再言
- 一屯防一役經營於事前因不易易維持於事後亦良難矣故詳論之
- 一頌贊之體亦因其事故今於屯防贊之其中敘述甚周讀者未可忽也

其子方... 其子方... 其子方...

其子方... 其子方... 其子方...

其子方... 其子方... 其子方...

其子方... 其子方... 其子方...

其子方... 其子方... 其子方...

其子方... 其子方... 其子方...

其子方... 其子方... 其子方...

永綏廳志卷之二十八

藝文門

奏疏屯防類目錄

請添設屯守備及增設屯把總外委以資經理而裨屯政

景安

屯田被旱欠租 奏懇分別蠲緩

慶保

李堯棟

奏請借款發商生息以資苗疆經費

慶保

李堯棟

奏屯田被旱征租不足並帶征無完經費短缺請先借款支給俟帶徵歸款

李堯棟

霖陳若

奏請借款賣補儲積

陳奏苗疆事宜

籌議苗疆事宜六條

左輔

張映漢

陳若霖

左輔

縷陳苗疆情形請飭該督撫令巡道等官實力整頓以重邊防

賀熙齡

永綏廳志卷之二十八藝文門奏疏屯防類中

請添設屯守備及增設屯把總外委以資經理而裨屯政

巡撫景安

竊奴才上年冬間巡閱苗疆據現升湖南臬司辰沅道傅鼐詳稱湖南鳳凰乾州永綏

古丈坪保靖瀘溪麻陽七廳縣均田屯勇前經

奏准安設屯弁經理惟查各廳縣屯丁七千名練勇一千名均專派各屯弁管帶訓練其各路均出歸屯田畝及續後開墾並官贖苗當民田共計田土八萬五千六百餘畝一切督耕催租等事亦責成各屯弁管理人數既多田畝亦復不少僅設屯千把外委等四十員名實有難以兼顧之勢又挑留兵五千名原派苗弁管帶其先後苗繳叛產佔田及苗人呈出田土共四萬二千一百餘畝亦令苗弁召佃收租支發口糧因苗弁經理未能盡善歷年均由道委員幫同管帶苗兵並監同催租支放尙皆妥協但所委之員均非現任不時更換亦非長計且統計屯丁練勇苗兵共一萬三千名僅止屯千把外委及派委微末員弁管帶難資約束設將來遇有徵調更恐不能得力查前項丁勇苗兵原係均田案內安設應請添設屯守備六員分駐各廳縣就近經理鳳凰廳丁勇

苗兵七千名擬添屯守備三員永綏廳屯丁苗兵三千八百名擬添設屯守備二員乾州古丈坪保靖三廳縣共屯丁苗兵二千二百名擬添設屯守備一員責令操演丁勇苗兵經管鎗械子藥軍裝其督耕催租等事一體責成該守備等董率各屯弁分理仍歸辰沅道統轄俾得遞相稽核所有各員缺應請於熟悉苗情屯務之營員及屯千把內遴選升調至原設屯弁四十員名現計分辦五廳縣屯務實屬不敷並請添設屯把總二員屯外委四員屯額外四名酌量派駐與原設各屯弁分理屯務一體歸廳縣管轄至挑丁授田等事仍照舊章均歸廳縣管理守備不准干預該守備等亦當予以升階應請照苗疆營守備之例定以五年俸滿如果始終奮勉准以營都司

題升所需分例照依營制守備每員歲支銀三百三十餘兩把總每員歲支銀一百四十餘兩外委每員歲支銀五十餘兩額外照馬兵分例每名歲支銀三十餘兩共歲支銀二千六百七十餘兩查近年鳳永二廳屯丁陸續墾田二千六百九十餘畝現屆成熟請即以此出召佃承種收租變價足敷支給統歸屯防案內一併造報等情詳請具

奏前來

奴才

當於巡閱之次就近詳加體察委屬實在情形並咨會督臣公同酌核意見

相同相應奏懇



皇上天恩俯如所請准其分別增設俾辦理得有專責又有分司而應支分例現有續墾田地召佃收租足敷支給卽無須請動

帑項而於屯防益臻周妥可垂永久如蒙

俞允所有應添屯守備六員卽令辰沅道將熟諳苗情屯務之營員會營遴選並於現任屯千總內揀員詳送督臣考驗分別具

題升調其請照苗疆營守備五年俸滿

題升營都司之處亦應由督臣考核辦理至增設屯把總外委額外十員名仍照原案於屯弁屯丁內以次拔補並飭將現在墾熟田地二千六百餘畝卽行清丈召佃收租備支有無餘剩核實造報理合會同湖廣總督臣汪志伊恭摺具

奏道光十四年

查明苗疆均屯田土酌量減租節用並捐賠儲備銀穀非

奏明不得擅動

巡撫廣厚

竊照前臬司傅鼎於道廳任內籌辦邊務盡心竭力悉臻周妥節經前撫臣奏明一切聽其通融辦理並奉

諭旨勿致伊掣肘等因在案迨奴才於嘉慶十年查閱苗疆查知丈收田土二萬餘畝收取租籽少報二萬餘石而所貯銀穀均已墊用無存恐有浮冒侵蝕等弊當飭署辰沅永靖道姚興潔將田租實數查明造冊呈送飭司核議上年奴才進京

陛見當經面奏

聖鑒本年回任後復奏委永順府知府福順永綏廳同知蔣紹宗會同姚興潔核實清查欽奉

諭旨查明具奏欽此現據查確稟報由藩臬兩司核明擬議詳請具

奏前來

奴才

覆查傳節節年在各廳縣均辦民苗田土經前撫臣阿林保景安於嘉慶十

年及十二三年奏報共丈收田土十三萬一千六十四畝六分除給屯長屯丁老幼丁等領耕田三萬七千八百四十九畝六分餘田土九萬三千二百十五畝召佃收租歲征額租七萬九百二十一石二斗以供鹽菜經費復因苗疆距省窵遠設有急需調解維艱兼以辦公賞及需租穀變價運脚折耗辦屯委員薪水夫馬紙張管倉屯弁長查田催租盤費飯食鎮城匯辦屯防檔案及收支兩總局各廳縣屯局經書工食紙筆檢蓋倉廩修製斗斛器具添製練勇軍裝苗弁因公往來盤費等項在所必需斷不能例

外請銷遂照民間佃種田土區以等差於正租之外征收餘租二萬八千餘石作爲外銷籌款按年支用又十四年傅鼎詳報丈收田土一萬五千二百十九畝三分十六年以後續查出田土五千八百七十三畝二分均未入

奏報部前項田土除撥給營兵等領耕及撥補水冲沙壓並礪卡圈佔田土一萬八十四畝三分外實餘田土一萬八畝二分每年征租五千六百六十三石二斗亦歸入餘租內撥作加增書院修葺城工等項之用查邊防經費專藉屯租而豐歉靡常須籌接濟是以前撫臣阿林保奏明於攤扣三成軍需銀兩展扣二年共銀六萬兩發交傅鼎買穀四萬石餘銀二萬零五百八十兩以爲儲備而正款應支之苗糧項下豐歲盈餘存爲苗倉積貯支銷外現應存穀二萬一千七百五十三石五斗以上共儲備銀二萬五百八十兩屯苗儲備積貯穀六萬一千七百五十三石五斗是經費有資儲備有款辦理原極周妥惟苗疆高阜山田雨澤稍稀卽形乾涸近溪田畝又多冲刷之虞一遇歲有不登逋欠纍纍且屯田每畝納穀一石數斗至少者亦征五六斗加於內地民糧十餘倍實難如數取盈是以歷年租穀多有欠缺甚至二十六兩年大屬歉收經費不敷而正籌各款不能減省均於儲備銀穀內借動計傅鼎任內先於丈收均田各苗弁

借領丈田經費穀六千五百五十石又詳明動借墊辦屯弁官房屯苗倉廩書院義學等項尙未歸補銀一萬八千五百四十八兩又因十二年荒歉動借穀九千五百零二石五斗又以倉廩公所抵交穀一萬三百九十七石七斗姚興潔任內因十六年大歉正籌各款不敷動借銀二千三十二兩穀二萬二千五百七十三石一斗合計傅鼎姚興潔兩任共借動銀二萬五百八十兩穀四萬九千二十三石三斗未能補還奴才因苗疆均屯田上租穀均有加多而儲備銀穀悉皆動墊恐有浸混冒等弊若不亟爲清釐既無以杜弊端而邊疆積貯更非妥爲籌備不足以垂久遠茲派委委員會同澈底查明據實稟報查苗疆田土磽瘠每年正額餘租共徵至十萬五千四百餘石本屬過多今按則核實酌量共須減去租籽五千五百石以紓佃力每年定以額租九萬九千九百八十八石三斗九升現查自嘉慶十年初立屯防起至十八年止九年之中豐歲可收至十萬石極少之年亦收至七萬石酌中計算常年總可收至八萬餘石近年苗情甚爲甯謐迥非傅鼎留防甫撤均屯經始之時可比每歲除應需官俸兵餉口糧等項各正款共需穀七萬五千四百餘石其外銷籌欸竭力樽節祇准支穀一萬一千六百餘石如有盈餘卽由道報明存貯正銷籌款共計歲支穀八萬七千一百餘石豐歉

相牽總可數用所有正銷各款請仍照傅鼐原定之數報部核銷其詳案及籌銷各款向未報部有案應請免其報部由該道每年據實詳報督臣及奴才衙門察核如查有虛冒浮匿即行叅奏治罪以示懲儆至儲備項下現僅存穀一萬二千七百三十石二斗動缺銀二萬五百八十兩穀四萬九千二十三石三斗自應設法補還以資邊儲而備積貯內傅鼐借給各苗弁支領丈田穀六千五百五十石本係各苗人自行存積因公動支今已歷數年查核情形實在無力繳還應懇

聖恩准予豁免以紓苗力又傅鼐以倉廩等項抵交有着穀一萬三百九十七石七斗外共短銀二萬五百八十兩穀三萬二千七十五石六斗以穀一石作銀一兩共計銀五萬二千六百五十五兩六錢查得傅鼐動墊各款洵屬因公不但人所共知並無私弊卽其急公經理之心久已上邀

聖鑒實可信其無他惟苗疆要地儲備銀穀未便虛懸今奴才擬捐養廉銀六千兩藩司翁元坻亦願捐四千兩尙短銀四萬二千六百餘兩復再四籌商請照前次通省攤扣三成軍需再展攤一年計銀三萬兩以資歸補尙少銀一萬二千六百五十五兩六錢署道姚興潔支用各款雖苗疆文武共見共聞嚴查尙無竇卽其辦理苗疆尙能遵守傳

蘇舊章數年以來均甚安靜但自十五年接任之後一切照常支發不能節省以致毫無歸補究屬持籌不善應責令照常賠繳俟完交後再行

奏請實授送部引

見此後儲備銀穀着落該道出具切結好爲收貯卽有要需實係歉收如租穀收不足數非詳

奉批准經

奴才

等奏明不得再行擅動所有

奴才

清查核議緣由理合會同湖廣總督

臣馬慧裕恭摺具

奏

嘉慶十九年題

屯田被旱欠租 奏懇分別蠲緩

總督慶保  
巡撫李堯棟

竊照湖南苗疆均屯勇設立屯防征收佃租以爲歲需經費所有民苗各佃承種官田原皆由民均出並有苗人退出歸公均在山崗高阜地皆磽瘠絕少塘堰灌陰每遇水旱不齊卽至收成歉薄苗屯各佃皆係窮苦所納額租又較輸賦爲重是以逐年不無蒂欠不得不緩帶征還其不敷經費歷年墊款支放本年苗疆夏間雨澤愆期屯佃早種二稻並山莊包穀被旱枯槁多致無收惟晚雜糧續霑雨澤稍穫收成據護辰沅道袁廷極稟稱苗疆額設屯糧九萬九千餘石今飭據屯防委員及屯備弁勘明各廳縣屯田被旱歉收等次不一統計推算僅可收租至六萬餘石計與額租歉收三萬餘石爲數較多無力墊用應請預爲籌款支放等情當經臣等批飭藩司委員確勘去後嗣據委員沅州府知府藍家瓚武岡州知州許紹宗前往會同按畝履勘實因屯苗佃種官田皆瘠薄之區今夏被旱較重收成卽至大歉核實總計屯苗無收佃租鳳凰廳一萬一千七百一十五石零永綏廳八千一百五十一石零古丈坪廳二百九石零保靖縣一千九百三十八石零麻陽縣七千六百五十六石零瀘溪縣四千三百三十五石零總共無收佃租三萬五千九百八十三石零並無捏飾情弊各廳縣造具清冊並該

委員加具印結由司道議詳分年緩帶徵還並請將嘉慶十六十九二十二二十  
二等五年苗屯佃戶種欠各租蠲免以紓佃力等情請

奏前來臣等伏查本年苗疆屯田因旱歉收業經委員等查勘確實所有歉收租穀三萬  
五千九百八十三石零若仍向各佃於本年催徵全完未免佃力拮据合無仰籲

聖恩緩至嘉慶二十五年秋後分作三年帶徵完足其前嘉慶十六年苗屯佃欠租穀一萬三  
千一百二十八石零十九年欠租八千六百五十石零又二十年欠租一千五十二石  
零二十一年欠租二千五百九十八石零二十三年因被蟲傷歉收並佃欠共一萬四  
千九百四十五石零俱經該道等逐年詳明所有經費均係墊用總共積年佃欠未完  
租穀四萬三百七十六石零均係實欠在佃該道等屢次催追無完並無以完捏欠情  
事查屯苗各佃歷年積欠佃租至四萬三百餘石若此時一並帶徵催追不但各佃力  
有未逮且恐有名無實本年恭奉

恩旨蠲除積年民欠據該護道稟稱屯苗各佃望

澤孔殷紛向籲求援照民欠豁免臣等伏思佃欠與民欠原屬無異可否恭懇

逾格鴻慈



俯照民欠積逋准予蠲免以廣

皇仁而揚

聖德惟查苗疆經費歲支有常每年額征佃租九萬九千九百餘石豐歲始能照數收足款收之年止收至七萬石豐歉牽算可收八萬餘石而每年應支正籌各款經費共需穀八萬七千餘石經前撫臣籌款設立儲備銀穀遇有歲歉經費不敷始准動用均經前撫臣廣厚於十九年清查均屯籌補儲備案內奏蒙  
聖聽惟查苗疆本年佃租因旱歉收多至三萬五千餘石現在

奏請緩帶征還其二十五年屯防經費自應先行籌款動墊臣等現飭查照原案於儲備項下暫行動借支用俟帶徵租穀歸補原款其十六年佃欠穀一萬三千一百二十八石零不敷經費業經前撫臣廣厚於十九年

奏案籌捐補足惟十九二十二十一二二十三等四年佃欠二萬七千二百餘石不敷經費均係該道等墊款動用其所墊實在銀數臣等現與藩司翁元圻並該護道等確查案據熟籌歸補容俟定議另行奏

聞謹合詞恭摺具 奏伏乞

聖上睿鑒訓示謹

奏嘉慶二十四年十二月題

奏請借款發商生息以資苗疆經費

總督慶保  
巡撫李堯棟

竊照湖南辰永沅靖道所轄苗疆周圍七百餘里界連黔粵各種苗徭錯處最關緊要嘉慶十年前撫臣阿林保等設立均屯於籌議章程案內

奏明將各廳縣士民均出田畝除公給各路防守屯丁自耕自食並撥與備戰練勇付佃收租作為口糧鹽菜外餘田所收租息以供各屯弁應得俸餉及歲修礮卡並一切籌銷外款之用並因儲備必不可缺

奏請於通省攤捐軍需三成項下展扣兩年共銀六萬以二萬兩存貯道庫以四萬兩採買穀四萬石分貯廳縣各倉以備歉歲收借給屯練口食及緩急不時之需籌畫本屬周妥惟各廳縣士民等均出各田畝多係磽瘠之地且苗疆跬步皆山水旱偶有不齊收成即至歉薄屯丁既鮮蓋藏佃戶復多拖欠因而數年之間將儲備銀穀一項借墊始盡經前撫臣廣厚於十九年

奏准分別捐賠並將攤捐三成軍需請再展扣一年歸補備貯在案茲自十九年以來頻年又多借支而十九年至二十三年佃欠未完租穀七千二百餘戶業經臣等奏蒙

天恩准予豁免聲明道庫墊用經費另籌歸補又二十四年苗疆被旱歉收各佃欠繳租穀三萬五千九百八十餘石復蒙

恩准緩至本年秋收後分作三年帶征其例需經費仍須道庫墊發現據護辰沅道袁廷極以前次續補儲備銀穀又將動用無存會同署藩司敦民詳請籌補並資接濟等情前來臣等查苗疆重地經費斷不可少儲備亦不可廢從前撫臣阿林保等以均田分撥抵給屯練勇丁弁口糧及各項應用之款祇係按照各田畝例納租穀之數計算嗣於十九年即經撫臣廣厚飭查確實

奏明苗疆每年應額征正餘租穀九萬九千九百餘石每年應支弁丁俸餉鹽菜口糧正款及籌款外銷款共穀八萬七千一百餘石如果豐足額尙有盈餘但歷年所收租穀總不過八九萬石及七萬石之數豐歉牽算每年止可收穀八萬石等語是應支必不可之經費需穀八萬七千一百餘石而所收均田之租穀牽算僅有八萬石核計每年所短經費以穀折銀均有短至六七千兩即無佃欠及因災蠲緩情事亦屬不敷支放而正銷外銷應用各款皆係前任道員傅鼐悉心議定詳請

奏准施行又不可輕議裁減致令現在鎮道廳縣於撫綏駕馭或有掣肘之處但因動用

儲備之欸旋補旋缺六七年後甫行清理一次未免遲緩並涉煩瑣且積貯所重者在防備緩急亦非專爲墊放俸餉及籌銷外款而設若仍援照前案再請展扣攤捐三成軍需以爲撥補轉令司庫待補之正款日久虛懸亦不過爲目前補苴之計臣慶保上年在湖南時即與臣李堯棟彼此面商必須另籌一經久之策方與苗疆有裨而飭查司庫又別無閑款可動伏思我

皇上化行千羽苗民懷畏

德威至今馴服安恬實屬從來所未有前此設立屯防屯丁應給口糧卽與兵餉無異原以分有均田可資費用不請動支正項今均田租穀因豐歉不齊收無足額頻年入不敷出臣等受

恩深重旣已深悉情形自當據實呈明通盤籌畫現已往返札商墊思審計與其屢請展扣攤捐三成軍需合無籲懇

皇上天恩俯准於南藩司庫內借動征存地丁銀十萬兩發交漢岸殷實商人分領營運按月一分行息每年應繳息銀一萬二千兩由湖北鹽催收分作兩次解交湖南藩司卽以五千兩先行撥還此次借動地丁項下陸續歸補十萬兩本款其餘七千兩全行轉發

辰沅道庫先儘當年應支正款經費不敷之用責成該道於籌銷外款一項樽節經理再將所餘銀兩無論多寡盡數歸於儲備項下陸續歸補蒙

恩豁免佃欠之墊給經費穀銀二萬七千二百餘兩及歷年借用外銷之欸似此分別籌辦不特苗疆經費無虞支絀儲備銀穀得歸實貯卽此現借之地丁本款亦可按年收回歸補不致虛糜一俟扣還地丁本銀及補足借動備貯原款後則苗疆每年可得息銀一萬二千兩經費更覺充裕加以存本十萬兩添作備貯專款尤爲緩急足恃屯防悉臻完備矣如蒙

俞允<sub>臣</sub>等卽當轉行遵照飭取領銀各商花名清冊報部存查並飭湖南藩司於每年收到撥還借動地丁銀五千兩隨時報部候撥其辰沅道支用應給正款屯餉不敷銀若干亦令於年底造冊移司轉詳咨部籌銷外款一項雖經各前撫<sub>臣</sub>奏明無庸報部應飭將實在需用同不敷若干之數按年造報督撫兩衙門稽查俾知有所節制而昭核實<sub>臣</sub>等實因苗疆非腹地可比經費與儲備並重亟須從長計議起見謹合詞恭摺具

奏伏乞

皇上睿鑒訓示謹

奏

嘉慶二十五年五月題

奏屯田被旱征租不足並帶征無完經費短缺請先借款支給俟帶徵歸款

巡撫 李鴻棟

竊照前據護辰沅道袁廷極具報本年苗疆地方夏雨稍稀民間田土均無塘堰灌注收成六七分不等惟均田土係民間指出歸公多在山崗高阜土膏磽瘠且少塘堰中晚二稻並雜糧收成統計止五分有餘各佃補種秋菽正在長發九月初九等日連次火雨水漲陡發多被冲刷等情當經臣飭藩司委岳常澧道多賚親詣確勘並於恭報雨水情形摺內奏蒙

聖鑒在案茲據委員岳常澧道多賚前往按畝履勘核實綜計屯田無收佃租鳳凰廳計穀一萬四千五百九十七石零乾州廳計穀三千九百一十四石零永綏廳計穀一萬九百七石零又土租三千七十二石零古丈坪計穀二百七石零保靖縣計穀二千二百六十七石零麻陽縣計穀八千一百三十石零瀘溪縣計穀四千六百二十九石零總共無收佃租穀四萬七千六百九十八石零實因夏間被旱歉收補種秋蕎復被山水冲刷並無捏節情弊各廳造具清冊並該委員加具印結由司籌議詳請具

奏前來臣查苗疆屯田租穀每年額徵九萬九千九百八十餘石本年因旱歉收補種秋

蕎又被水冲僅可收得出租穀五萬二千二百九十餘石歉收租穀四萬七千六百九十餘石該佃等上年因旱歉收業將無收佃租

奏明於本年起分帶徵還今歲復又被旱收成尙有五分若仍全行催徵苗屯佃力未免拮据合無仰懇

皇上天恩俯准將本年歉收佃租四萬七千六百九十餘石緩至明年秋後分作三年帶徵完繳其應帶徵二十四年佃租穀三萬五千九百八十餘石亦請緩至明年秋收後遞緩帶征以紓佃力惟屯田租穀應行支放屯弁丁勇俸餉鹽菜口糧並修理礮卡及籌銷外款又續有加增外款共歲需穀九萬四千五十餘石每年全徵佃租穀九萬九千九百八十餘石止餘穀五千九百三十餘石今因旱歉收僅徵穀五萬二千二百九十餘石不敷穀四萬一千七百六十餘石臣與藩司左輔及該護道袁廷極等通盤籌算查原設儲備銀二萬五百八十餘兩儲備穀四萬石原備歉收而設因嘉慶十九年以後節年歉收動借業於二十四年

奏明在案現在所存儲備穀數無多本年因苗疆儲備無幾經費頻年短絀會同調任督

臣慶保

奏請借撥地丁銀十萬兩發交湖北漢岸鹽商按月一分行息每年應得息銀一萬二千兩分別歸還借款並經費不敷之用如有盈餘盡歸儲備原款奉

旨允准遵辦但所收息銀須至下年始能按足一年交收現在一切經費在在應支所有本年佃租款收不敷經費穀四萬一千七百六十餘石籌銷外款內尙可節減穀九百二十七石六斗實計不敷經費穀四萬八百三十餘石以穀一石拆銀一兩計少經費銀四萬八百三十餘兩應于司庫暫行借項支發查司庫現有各屬公捐解還通米經費銀五萬一千餘兩可以動借並懇

聖恩俯准按數由司撥解道庫支用仍候帶征佃租變價歸還如蒙

俞允再行動撥其原設儲備銀穀歷年借動支發現在實應存貯數目臣查尙有轆轤未清之

處現飭藩司率同委員等與該護道逐一清算詳報勿任稍有欺隱所有苗疆因旱款

收佃租議請緩帶徵還及動借經費緣由理合會同湖廣督臣張映漢恭摺具奏伏乞

皇上聖鑒訓示謹

奏  
嘉慶二十五年十月題



奏請借款買補儲積

總督陳若霖  
巡撫左輔

竊照疆地處邊圉儲備最關緊要嘉慶十年前撫臣阿林保等設立均屯籌議章程

案內

奏請於通省養廉攤捐銀六萬兩買穀四萬石分貯廳縣各倉以銀二萬兩並買穀餘剩銀五百八十兩一並存貯辰沅道庫以備出款收借給屯練口食等項之用嗣因頻年動墊殆盡經前撫臣廣厚清查准分別捐賠歸補又苗倉積貯項下自嘉慶十年設屯起截至道光二年九月底止除照

奏案支銷動用外應存穀一萬九千九百餘石統共屯防儲備積貯銀穀以銀一兩作穀一石共應實存穀七萬八千四百八十餘石查至嘉慶十九年清查歸補之用節年又因旱歉各佃欠交租穀及外銷不敷經費墊用儲備積貯銀穀所存無幾二十四年苗疆旱歉佃欠租穀三萬五千九百餘石

奏明分作三年帶徵所有本年不敷經費儲備項下又將動用無存應請另議籌補是以二十五年五月經前督臣慶保等籌議

奏請於湖南藩庫內借動地丁銀十萬兩發交漢岸鹽商生息每年應繳銀一萬二千兩

歸還原本以七千兩發交辰沅道庫先儘當年應支正款經費不敷之用所餘銀兩盡數提補儲備積貯銀穀又因二十五年復逢旱歉佃欠租籽過多因於司庫通米經費項下動借銀四萬八百三十餘兩以供支放俟帶徵佃欠歸款咨在案<sub>臣</sub>等伏查苗疆儲備積貯共應憑實存銀穀七萬八千四百八十餘石前因歷年經費不敷動存無幾本年據護辰沅道叅革沅州府知府袁廷極卸事時交出已徵未報二十四年租穀一萬一千一百一十九石零同動用所存尾穀共實存穀一萬七千五百六十餘石計尙有動缺銀穀六萬九百二十餘石現經飭據該道趙文在會同委員求順府知府諸嘉杏等逐年逐款詳加核算實無侵欺浮冒惟是嘉慶二十四五兩年各佃未完租穀現經<sub>臣</sub>等另行恭摺奏懇

聖恩豁免所有動缺儲備積貯銀穀祇借漢商生息銀兩補苴而漢商息銀又須先儘本年正款經費不敷之用則儲備積貯二項銀穀難以尅期補完緩急所需無可足恃苗疆要地深以爲慮現又無款可籌<sub>臣</sub>等再四思維查嘉慶四年戶部以歷次辦理軍需動缺各省藩司及屬庫封貯銀兩請在外省收捐監生以歸款奉

旨俞允湖南藩司及各府庫動缺封貯銀兩均已歸補足數苗疆屯防儲備與屬庫封貯銀

兩相同且邊備尤爲緊要合無仰懇

聖恩俯准在於司庫收捐監生銀兩內借動六萬九百兩發交辰沅道照依時價採買穀石先行歸貯廳縣等倉仍照原案以銀二萬兩收貯道庫所有漢商每年生息銀一萬二千兩以五千兩歸還地丁原款外其餘銀七千兩先儘本年經費不敷之用餘銀卽飭盡數解交司庫陸續歸還現借捐監及前借司庫通米銀兩等現將屯防經費逐一籌議核減此後歲支出納飭令辰沅道詳慎樽節經理等嚴加查核勿任稍有虛糜尋常之年卽因佃租或稍欠缺糶價或有短絀諒亦無多所收商息除每年開稍經費不敷外盈餘數歸補借款司庫銀兩亦不致於久懸似此一轉移間儲積胥歸實貯邊圉益臻鞏固如蒙

俞允<sub>臣</sub>等卽飭藩司將銀按數撥解辰沅道飭令辰沅道督率各廳縣乘時買穀收貯並令藩司於每年收到撥還借動捐監等銀隨時報部查核茲據藩司錢臻轉據辰沅道議詳請

奏前來<sub>臣</sub>等爲邊儲緊要起見謹合詞恭摺具

奏伏乞

皇上睿鑒訓示謹

奏 道光元年十月 題

陳奏苗疆事宜

爲楚省苗疆應行籌酌事宜請

旨勅交查議事竊臣前於

召見之日蒙

皇上垂詢苗疆緣口奏不能詳備謹遵

旨繕摺恭呈仰祈

聖鑒臣上年在湖廣總督任內七月有餘苗疆遠隔湖南尙未及親履其地然因邊境緊要

於到任後卽隨時遇事體訪多有應因時調劑者前經札飭辰沅永靖道趙文在並委

湖北黃州協都司鄭國鴻密查稟辦尙未據覆到臣卽起程北上並無攜帶案卷謹就

臣平日抄錄要件並記憶所及繕就六條恐亦未能詳晰謹遵

旨據實臚陳奏

聞惟求

刑部右侍郎 張映漢

天恩

勅令湖廣總督湖南巡撫臣遂細詳查案據妥議具

奏請

旨施行是否有當理合繕摺恭

奏道光元年

籌議苗疆事宜六條

總督陳若霖  
巡撫左補

竊臣等承准

廷寄道光元年四月初十日欽奉

上諭據張映漢奏籌議苗疆事宜一摺湖南苗疆舊立章程原欲使苗民永遠樂業相安無事乃近日漸就廢弛如摺內所稱屯丁缺出屯官自以隨帶私人充頂其屯丁子弟轉致失業日久必啟爭端至苗疆租賦應從輕減俾安樂利但減租先須省費現在租穀支銷既多有名無實之款自應核實減汰量人為出以垂久遠其七廳縣倉貯備早潦之需如有虧缺更當嚴行查辦稍寬鹽禁以免苗人淡食亦可量為變通至差役私入苗寨本干嚴禁應飭廳縣各衙門實力奉行苗額舉人例一體會試當嚴禁書吏需費或酌給公車路會俾知踴躍以上各條張映漢在楚體察較真着陳若霖會同左輔逐

一查明妥籌辦理務令苗民不受侵擾之累地方緩急有備撫字得宜庶永享綏安之福也張映漢原摺着發給閱看將此諭令知之欽此仰見我

皇上溥愛民苗籌計安全之至意臣等跪讀之下欽服難名伏查苗疆自嘉慶二年大兵戡定該處士民知身家非兵勇莫衛兵勇非屯田莫贍各願將田歸公以資兵勇養贍前任辰沅永靖道傅鼎修稠築堡挑丁練勇陸續支收田土共十三萬一千零六十四畝六分分別給丁領種召佃收租經前撫臣阿林保等

奏定章程每年額征佃租七萬九百餘石以供屯防經費所有原設留防之鄉勇士塘苗兵均皆停支鹽糧令其歸屯領耕且耕且守計每年節省

國帑八萬二千餘兩糧米六千三百餘石以本地所生之財爲本地衛民之用洵屬籌邊良法嘉慶十四年又續丈出田土一萬餘畝每年征租五千六百餘石以爲加增書院義學試資等項之需教養兼施尤屬美備復因辦公賞需變糶運脚折耗並催收租穀夫馬盤費滙辦屯防冊檔津貼備整器具各項工食等款支銷在所必需又續於正租之外征收餘租二萬八千九百餘石以爲支銷經費每歲計征正餘租穀十萬五千四百餘石遂致佃力拮据屢有拖欠嗣於十九年前撫臣廣厚因苗疆租數過重征收難

於足額減去租穀五千五百石

奏明歲征租穀九萬九千九百餘石此苗疆設立屯防定租供支之原委也臣左輔上年到楚體察情形苗疆均屯田土皆多磽瘠以致水旱偶有不齊收成輒形歉薄閭閻恆鮮蓋藏臣以田土固屬瘠薄若以人工培治未嘗不可轉爲肥饒此在各屯弁等盡心勸人頂補丁缺等弊當卽列款札飭辰沅道趙文在分別詳細查辦適臣陳若霖到任欽奉

諭旨會同查議仰見

聖謨廣運凡所

指示悉屬邊防至計臣等遵卽會飭辰沅道趙文在及委員永順府知府諸嘉杏永綏廳同知蔣紹宗湖北提標中營參將鄭國鴻等按款查明妥議詳覆一面將屯官私補丁缺差役拘傳苗人及委員辦屯三款先行禁革業經臣陳若霖附片奏蒙

聖鑒茲據該道等查明分款籌議由藩司錢臣覆核議詳請

奏前來臣等覆查苗疆未經戡定以前民人田產盡爲苗佔自設屯以後各將田土均出歸公而苗人佔叛田業亦俱呈繳入官多賴佃種官田以資餬口嘉慶二十四五兩

年疊逢旱歉各佃無力完租經前督撫臣秦奉

恩旨俯准緩帶征還現在佃力拮据難以完納經臣等另行恭摺

奏懇蠲免臣等竊思苗疆治安日久生聚漸繁而該處田少山多地皆磽瘠小民火耕水耨終歲勤動所獲無多在豐稔之年收穫穀石除完納外僅敷口食本鮮餘蓄一遇歉欠卽形匱乏查屯防租穀自加餘租之後本屬較重再若仍照額徵收佃力實形竭蹶自應大加酌減俾資事畜臣與該道等悉心酌核應請於額租內均勻減去穀一萬八千石並於田土全行歸公及最爲瘠薄之區再減去二千七百七十石實徵租穀七萬九千餘石仍飭該道於屯弁內挑選熟諳務之員督率百總小旂人等勸課各佃多開塘堰培治田土每歲收穫著有成效加以獎拔倘有任聽荒蕪亦卽嚴行懲儆地利既厚民生自足其屯丁內之並非均田本戶及出力丁勇子弟或非土著之人概行革退遵照舊日章程另行僉充佃租既減一切屯防經費尤宜樽節支銷咸歸實用所有苗兵火藥及委員冗費等款均應核實分別裁減共應減去經費及餘穀二萬七千七十石每年實需支銷銀穀七萬九千餘石適符現議徵收之數飭令該道以後計慎經理毋許稍有虛糜至苗疆儲備積貯銀穀原爲緩急不時之需因歷年屯防經費不敷共



動缺銀穀六萬九百二十餘石現止存穀一萬七千五百六十餘石臣等飭據該道趙文在與委員永順府知府諸嘉杏等逐年逐款詳加查核並無侵欺浮冒現經臣等籌議另行恭摺

奏請借款歸補以實邊儲嗣後如有要需及歉年收租絀領由道詳經臣等

奏明再行借動如有虧挪霉變等弊應照常平倉儲之例分別參賠以昭慎重所有經營屯防佐雜各委員均已裁撤並將不協苗情之永順縣典史王允吉候補縣丞陳樹梓咨部分別休革外一切催徵支放悉歸道廳縣屯官經理嚴禁差役擅入苗寨拘傳苗人如有勾攝等事遵照舊章由苗弁傳喚以符政體而免擾累苗舉人歷科均未請咨進京會試現經查明實因伊等自知文理平常難與各省貢士較藝是以均未赴京應試並無胥吏勒索抑指之弊茲復籌議添補膏火令苗舉人俱入書院肄業俟文理稍優於照例給與公車銀兩外再行由道酌給盤費俾知奮勵其不願會試者仍聽其便又苗疆遠處邊隅准鹽不能隨時運到若不量爲變通民苗誠有淡食之虞然聽其竟買私鹽又恐侵灌日甚准綱殊有關係應請查照湖北歸州巴東等州縣之例如遇准鹽不能接濟聽民買食川鹽不得過十觔之數以便民食而資調劑以上各條臣等悉

心會籌已審將屯防款目斟酌損益民苗利弊分別興除徭賦既得輕減支銷亦歸核實<sub>臣</sub>等仍諄飭該道督率廳縣實心經理加意撫綏可期恆久不弊<sub>臣</sub>疆永遠相安以仰副

聖主久安邊圉之至意所有會查各籌議緣由謹合詞恭摺具

奏並將議覆<sub>臣</sub>疆事宜各條敬繕清單恭呈

銜覽

一刑部侍郎張映漢奏稱屯丁缺出委員屯官間以隨帶私人頂充而屯丁子弟轉有不得充補者積年累月必致均田全屬外來之人佔據應查明仍令均田等戶之子孫兄弟頂補以符舊章等語<sub>臣</sub>等查鳳凰乾州永綏古丈坪保靖五廳縣額設屯丁七千名經入章程案內

奏明於均田之本戶及出力之丁勇內挑選授田令其且耕且守奉爲世業洵屬寓兵於農之法凡遇屯丁辭退病故開除丁缺自應查照章程頂補不得外人攙越嘉慶十九年永綏廳裁汰廳標額兵議令歸營拔補名糧其中不願入營之兵間有該廳及委員跟丁者求於屯防拔補丁缺經前署永綏廳同知李慶茂稟道准予拔補以致浮議漸

生查汰兵原議歸營該署廳李慶茂率請拔補屯丁致佔丁缺有案舊章該廳業經病故應毋庸議其委員等間有亦以跟丁頂補屯丁究係援照頂補尙非無因亦請免議現據該道趙文在及委員等查明有汰兵鄭開科等頂補丁缺已悉令將田退繳仍照原例送營拔補其退出之田即將應補之丁簽充領耕俾守恆業臣等仍飭該道趙文在遴選熟諳農事之屯弁督令百總小旂人等勤加勸課多開塘堰一切隨時致力務得耕耨之宜以期瘠土可肥薄收可厚如能著有成效分別量予獎拔以示鼓勵倘有怠弛任聽荒蕪者亦卽加以懲儆地利收而民生厚庶於屯政大有裨益

一據刑部侍郎臣張映漢奏稱該處土性磽瘠應繳租穀每畝雖只收一石八斗加以挑運盤費斗面折耗總須二石一斗零方敷完納偶值歉收請緩加以遞年帶征更形竭蹶應量爲輕減惟是苗疆經費有常必須通盤核算方無支絀按每年支銷各款虛糜浮濫可以裁汰者卽如苗兵操演火藥修理事械等款查自嘉慶十五年奉

諭毋庸操演而每年仍照舊開銷又如歲修城工廟宇津貼營兵并育嬰堂養濟院等款按名目似屬緊要風聞亦均有名無實又如屯官書識跟丁應於該處現食鹽糧之練勇撥充以免另給工食再應發款內有可發穀者發穀有應授田者授田事歸簡易可省

運津貼之資等語臣等查屯防佃租自嘉慶十九年清查案內

奏定額征九萬九千九百八十八石三斗九升歷年照額征收以供經費惟屯田多在高阜土性瘠薄雨澤稍稀卽以乾旱爲虞各佃上繳官租雖遇年登之歲尙難如數取盈若遇歉年逋欠壘纍征收一有短絀經費卽屬不敷今爲苗疆經久之計誠如

聖諭減租先須節費臣等將歷年支銷以及征租各數詳細稽核如條奏內應裁各款除津貼營兵穀五百石業經前任辰沅道桃興潔於嘉慶十九年清查案內詳明裁省外其苗兵火葯委員冗費以及歲修城工廟宇等款悉行遵照裁汰共省銀穀三千五百七十三石五斗二升其兩官之書識跟丁改以練勇撥充除應留加給稿書七名仍給工食并加閏銀五十一兩一錢八分外計減銀一千二百兩又老幼丁未能授田者一百九十七名應仍於屯防項下支銷穀四百七十二石八斗外其應授田土者現各丁查照原定章程分授田土計應減口糧穀三千三百一十二石至育嬰堂養濟院二項實爲慈幼卹貧善政應行酌留以普惠養惟查永綏廳另設有殘廢一欸支銷應裁去養濟院項下穀一百石此外臣等復查有每年應存之苗租積貯苗寨現在實貯及另議歸補已有穀一萬七千九百石足資接濟伏思嘉慶十五年苗兵停操

聖訓計遠慮周以此類推苗倉似未便再行添貯應將每年應存苗積貯穀三千五百五十石悉行汰以減苗租又每年佃租支銷屯防經費之外應餘租穀五千餘石連年各道均因佃欠徵不足數並無餘存竟屬有名無實自應減此虛數以歸實在應減穀五千九百三十五石又廳縣等官辦公穀酌留一半足敷撫綏賞賚之需應減穀一千二百石又各處倉廩應行歸併所有歲支修葺倉書斗級工食以及盤折撥運等費共減穀七百石又修理水冲沙壓田土支銷多寡實難預定現有漢商息銀以補經費不敷之用此後修理自應於息銀內實用實銷不必預爲定數致滋虛冒應將前定修費穀內裁減一千二百石統計裁減銀穀二萬零七百七十石每年尙應需經費銀穀七萬九千二百一十八石零內共應發穀五萬三千三百七十一石七升發銀二萬五千八百四十六兩六錢八分五釐九毫三絲二忽是經費既減租賦即可從輕應於民苗佃種田土內按則派減租穀一萬八千石再於瀘麻二縣之最瘠田畝並鳳永二廳民苗田土全行歸公之處已無餘業佃情更窘再減穀二千七百七十石以紓佃力而厚民生統計共減租穀二萬七百七十石核與現議應存之款數相符飭令該道查明各廳縣議減租籽細數分晰造册另行詳送查核其從前正署各道虛銷苗兵火藥一項據

該道趙文在會委員等查明前道姚興潔任內自嘉慶十九年清查以前動用各款業已

奏結其清查以後起至二十二年止三年報銷之穀係爲添製練勇鍋帳等項之用並未領項請銷現在鍋帳等項齊全貯庫其前護道袁廷極任內自二十二年起至二十五年報銷之穀係因前道姚興潔流攤墊造苗地公所及添建倉廩等項卽藉此款彌補清楚均有案據雖非實用實銷尙屬以公濟公並無侵漁入己且前道姚興潔久經病故護道袁廷極已另案叅辦應毋庸議所有屯防支銷各款經此次裁減之後悉歸樽節各佃於正供之外多得盈餘足贍身家其應納租穀自必踴躍輸將卽責成該道督率廳縣會同屯備弁等實力催征年清年款據實具報倘遇大歉之歲詳經臣等委員勘明

奏請照例分別蠲緩其當年經費不敷由道督率廳縣查明確數詳請籌款撥用不許私動儲積銀穀以杜虧挪如有刁佃拖欠照依錢糧嚴行追比除查明實係逃亡租穀無着者卽行另招妥戶承種外餘俱不得無故提田另佃以致原佃失業若各佃自願退出者應聽其便如此妥爲經理則民苗羣沾樂利矣

一據刑部侍郎臣張映漢奏稱苗租項下每年餘租四千石原爲積貯按濟苗民之用自嘉慶十一年起至二十五年卽除荒年仙欠亦應存穀四萬餘石加以每年支銷餘剩之穀爲數自應不少風聞現在儲備僅存一千五百石何至如此之少應行澈查再苗民例銷准鹽水陸二千餘里淮商成本攸關萬難運賣偶有水販運往色黑味苦苗人向食川鹽應請准其零星入苗疆挑賣庶免苗人淡食之虞等語臣等查苗疆自嘉慶十年設立屯防經前撫臣阿林保於經久章程案內

奏請於通省養廉內攤捐銀六萬兩以銀四萬兩買穀四萬石分貯廳縣各倉以銀二萬兩並買穀餘剩銀五百八十兩一併存貯辰沅道庫以爲儲備如遇屯田歉收之年卽將此項銀穀爲借給屯練口食之用嗣因頻年動墊嘉慶十九年經前撫臣廣厚核實清查

奏准分別捐賠照數歸補又苗積貯一欸係支發苗糧項下豐年盈餘存貯苗倉以爲積貯計自嘉慶十年起至十九年止除照案支發外應存穀二萬一千七百五十三石五斗十九年清查案內

奏豁苗備弁借領穀六千五百五十石並前任辰沅道傅鼎以倉廩等項抵穀一萬三百

九十七石七斗實貯苗倉積貯穀四千八百五石八斗零又嘉慶十九年十月起至道光元年九月止除嘉慶二十四五兩年旱歉缺收並無餘存外共存穀一萬三千一百石零八斗三升一合八勺總共應存苗倉積貯穀一萬七千九百六石六斗三升三合七勺以銀一兩作穀一石總計屯防儲備苗倉積貯兩項共應存穀七萬八千四百八十六石三升三合七勺均爲屯防緩急之需查自嘉慶十九年清查以後節年又因旱歉屯防各佃欠交租穀及外銷不敷經費墊用僅存儲備穀一千三百九十五石五斗三升二合七勺又前護辰沅道袁廷極交卸時復交出二十五年至道光元年應存積貯穀三千五百五十石又袁廷極交出已徵未報二十四年佃租一萬一千一百一十九石零總共存穀一萬七千五百六十四石二斗七合四勺臣等飭據該道趙文在及委員等查明儲備積貯兩項實因收租缺額支放無資逐年借動支用歷任正署各道均無侵欺情弊臣等現在另行籌議恭摺

奏請借款歸補以實邊儲再查永綏永順等廳縣額設苗鹽引三千二百七十一道乾州鳳凰二廳向無專引均由水販轉運淮鹽銷售該處程途寫遠成本較重勢不能隨時運至不得不藉資川鹽然聽其竟行買食又於淮綱大局有碍應請查照湖北歸州巴



東等州縣如遇淮鹽不能接濟聽民零買川鹽不得過十觔之例准民苗零星買食川鹽似此權宜調劑淮綱之藩籬不撤而民苗可無淡食之虞如有大夥私販仍責成地方官嚴行緝拿以免浸灌

一據刑部侍郎臣張映漢奏稱屯防委員大半捐納佐雜其中自愛者固有而窮急不肖者勢所不免非甘爲該道用人通同舞弊卽任意赴屯滋擾而仍給予經費其地方之該廳縣皆置身局外殊爲有損無益應行裁撤專責該廳縣督率屯官經理等語臣等查創立屯防之先辦理一切事宜原資委員之力自屯防已定設官分職各有專司委員原可裁撤因該員等皆係原辦熟手未便輕去是以仍留贊襄嗣原辦之員均經升遷內地新進佐雜又復相沿派委以致廳縣各官轉成局外茲飭據該道趙文在及委員等查明歷任正署各道支銷各款並無侵冒該委員等亦無通同舞弊以及任意滋擾情事臣等已於奉

旨後先行

奏明裁汰所有該委員等歲支經費概行刪除此後收支一切除經費鹽糧等項仍由該道總司出納其催征租穀以及坐支各款卽責成廳縣專司各分地段令屯弁承催屯

備督催如催徵不力仍照往例分別分數屯備弁等各予記過如能年清年款經營備弁各予記功以示勸懲至應行解道之經費定限五月內完解如逾限未清照例叅處其該廳縣坐支各欸由屯長查明應領之數按月書票送屯備核明蓋印再送廳縣蓋印掛發每年將收支各欸數由廳屯造具細冊賚道彙報司倉屯長等仍將所發印票送道查對似此層層稽核妥爲經理既免侵挪亦杜尅扣之弊

一據刑部侍郎臣張映漢奏稱苗人訟案應到官質審者令苗弁傳喚以免差役往傳藉端詐索近聞有假差擅入苗寨勾引窮苗妄指毀實苗人平空架訟應嚴行查禁等語臣等查原定章程苗人控訴詞訟必須集案質訊者卽令苗弁傳送不許擅差兵役入寨妄拿以民苗言語不通易受欺凌兵役恣意擾累恐致滋生事端洵爲杜漸防微之道日久禁弛弊端漸起臣等於奉

旨後嚴行示禁並札飭該臣趙文在確加訪查嚴懲究辦茲據該道趙文在及委員等查明各廳遇有苗人控訴事件向係諭令苗弁送案備審從不差役徑往拘喚亦無假差擅入苗寨妄拏無辜之事臣等現經嚴飭道廳縣衙門如有訟事應須勾攝苗人卽令該處苗弁往傳送審嚴查兵役不得擅入苗寨倘有徇隱卽由道查明據實參辦其苗弁

兵等如有以勾攝爲由擾累苗衆亦卽從嚴責懲以輯邊圉

一據刑部侍郎臣張映漢奏稱苗額舉人自設科以來每科取中一名總未見會試大抵由地方官書吏於其請咨時橫行索費以致阻抑應飭廳縣凡苗額舉人除不願會試者仍聽其便外其有呈請會試者立予詳請給咨嚴禁書吏索取規費並照民籍舉人會試者分別給予公車銀兩或准令馳駟等語臣等查苗舉人自嘉慶十二年議額另編田字號苗生鄉試數在十五名以上准其取中一名嗣後各科苗生均獲中式所以勵其功名卽以銷其頑梗惟自編設苗疆以後苗生中式者計有六名從未請咨赴京會試飭據道趙文在及委員等傳集各苗舉人詢問皆因自揣文理平常難與各省貢士校藝是以未經請咨會試等語委無書吏需索抑措之事現經該道發給膏火令其在書院肄業苗舉俱願就學俟文理稍優再請咨赴試臣等伏思苗民仰蒙聖化涵濡日久冀其文風日上頑性日消自應預行籌計以作興其向上之志臣等現議該苗舉人等如有情願赴京會試者除照本省民籍舉人之例給與公車銀兩外再由道酌給盤費俾資津貼並嚴禁各衙門書吏於其請咨時不許稍有需索其不願赴試者仍聽其便

縷陳苗疆情形請飭該督撫令巡道等官實力整頓以重邊防

京畿道監察御史 賀熙齡

竊查湖南苗疆自嘉慶初年戡定之後苗情極爲安恬良由撫綏得宜控制有方聞近年來該處情形漸就廢弛殊非慎重邊防之道臣謹就所聞縷陳於左

一沿邊礮卡宜及時修葺以資捍禦也查湖南苗疆鳳凰乾州永綏古丈坪保靖等五廳

縣沿邊一路於嘉慶二年以後次第修建屯堡礮樓石卡礮臺礮臺共一千一百餘座邊牆一百餘里邊牆以嚴界畫屯堡以資鞏衛礮台以瞭望礮台以堵截礮卡兩項則以守以戰所以捍禦邊疆至爲詳備原籌有歲修經費二千九百餘兩由辰沅永靖道經管支銷遇有坍塌隨時補築乃聞近來報銷不實各廳縣礮卡等項坍塌者多偶值督撫巡閱之時亦僅於所經過之處畧加粘補此外聽其頽壞似此年復一年將來必致傾廢無存殊非設險以守之道是宜亟加修葺以固藩籬其經費無需另籌惟令將歲修款項實用實銷務須一律整齊完固庶可長資保障而永衛民生矣

一撥給丁田宜附近礮卡以便駐守也查苗疆各廳縣共設屯丁七千名內散丁每名給田四畝五分小旗每名給田五畝五分總旗每名給田六畝五分百總每名給田七畝

五分皆以附碼卡之田撥令耕種俾之且耕且守共備干城聞近來屯務書吏因田肥瘠受屯丁等賄囑任意撥給往往有所守在此而所耕之田在數十里之外者致碼卡空虛無人駐守而樓座因之亦易頽壞是宜於撥給丁田之時確實查核務令各於碼卡切近如書吏受賄舞弊卽嚴行懲辦以收屯防實效且各碼卡修葺之後有丁駐守各照管亦可經久不敝是又兩全之道也

一屯防田土宜隨時修治以符定額也查鳳凰乾州永綏古丈坪四廳保靖瀘溪麻陽等三縣共屯防田土十三萬一千餘畝除分撥屯丁領耕外餘俱召佃收租以充經費惟各應縣田土附近山溪每多水冲沙壓之患原籌有修理田土工本穀三千餘石遇有冲壓卽勘報動項興修乃近聞款目雖存興修不實凡田土冲壓俱令佃戶自行修理該佃戶等無力興修卽聽其荒廢及額租逾限則追呼四出其至以牛隻作抵致誤來歲春耕或則另換新佃責令頂繳租糧尤不甚追逼之苦種種之累皆緣侵蝕工本不肯給費修治之故是宜將公項盡歸公用春夏山溪水漲田土遇有冲壓一經丁佃稟報立飭屯弁勘明分別給以工本趕緊挑修庶款項有濟而額租常盈矣

一備戰練勇宜照額訓練以復精銳也查苗疆各廳縣內鳳凰一廳尤關緊要原設練勇

一千名分別鎗炮弓箭藤牌各隊並練習跳高跋坡等技名曰道標於每季大操每月常操之外又將各隊分日赴道署校閱在當時最稱精銳道光元年

奏准於練勇內撥出一百七十八名作爲各屯弁之字識跟丁現在惟存練勇八百餘名而此八百餘名中又多以厨役匠作雜項人等充數計能操演者不過五六百名其跳高跋坡等技均皆停止亦並不赴道署校閱遇督撫巡閱之時亦止虛作架式人數不足則調取屯丁冒稱練勇使之隨同文帳站門以掩飾上司耳目坐使有用之勁旅徒屬虛名是不可不照舊認真訓練仍按期操演分隊校閱並練習跳高跋坡等技以照核實而鎮邊疆

一丁弁補缺宜嚴禁需索以示體卹也查苗疆屯丁內之百總總小旗及辦屯管倉之總散屯長遇有缺出向由各縣遴選詳道頂補念係貧寒免其跋涉故不送道署驗看近聞無論遠近皆須親提道署未驗之先守候需時既驗之後書吏等勒令送繳規費然後給與委牌執照其名爲八百八實需繳制錢三四千至七八千不等又屯丁受田遇有缺出向例卽以該丁之子弟親屬頂補近則書吏舞弊往往使應補者失業而不應補者得以賄求每一缺出取數千至十餘千不等其田之肥美者或取錢二三十千

文不等又苗疆內原設有苗守備苗千總苗把總苗外委等弁例由辰沅永靖道及廳縣等於諸苗中擇取誠實者秉公拔補不得其人則肆其强悍凌競平苗仇殺之風卽此而起近聞亦有書吏受賄情求拔補之弊是不可不嚴行剔除以卹丁弁以順苗情

一差役人等宜禁入苗地以防滋擾也查苗疆苗人有詞訟案件向令苗弁傳送不准擅差兵役入寨漢民不准與苗人往來婚姻卽在集場交易亦令屯汛員弁親征彈壓不准市儈侵凌所以區別民苗使之兩無嫌隙近聞此禁廢弛漢民仍不時與民人往來不無盤剝之弊遇有干涉苗人案件地方官輒差役傳提該差役等一入苗寨肆行無忌往往乘坐轎馬逼令苗人沿途護送及到事主之家任意誣索甚至擅行鞭責詈辱苗弁向來苗人滋事多因於此必應一律嚴行申禁以弭事端

一苗人祭鬼宜嚴申例禁以正風俗也查苗人向有椎牛祭鬼之習每聚衆持刀將牛札斃視牛前所向以占吉凶不惟每歲殘殺耕牛無算而且聚集多人時虞滋事嘉慶初年業經禁止近聞此風復起宜責成苗弁分寨查禁如有不遵送官究治若苗弁隱徇不報一經查明從重責革

一黔 交界宜遇事商辦以息爭端也查鳳凰永綏二廳與黔省接壤苗地處處可通兼

之苗人或爲舊時姻婭或因集場交易是不能禁其不相往來其間偶有嫌隙因而互相訐控者有之又或因錢債細故彼此強牽牛隻或拿人勒贖堅不退還告官關提亦不到案應隨時會同黔省松桃廳妥爲查辦秉公斷結不許滋生事端

一書院義館宜實心迪牖以廣教化也查苗疆各廳縣皆設有書院一所又設有屯館五十所屯館五十所其束脩膏火俱取給於官贖田租項下原欲使該廳縣生童及屯苗子弟一體讀書咸知義理乃近聞各處書院有以官親濫居師席者有坐支束脩終年不到館者其屯苗義館教讀之人向由辰沅永靖道考取充當近則咸由屯長保送與之坐分束脩而義館亦爲虛設是宜慎選端人實心教讀剔除前項情弊以收化民成俗之效

以上數條應請

旨勅下湖廣總督湖南巡撫督令辰沅靖道實力整頓無任廢弛以期保衛民生永綏邊遇總之苗疆一切屯防教養訓練儲備諸事宜胥歸巡道經管巡道得其人則深思遠慮未來之陰雨尙切綢繆不得其人則利己營私已立之章程猶將廢墜臣爲慎重邊防起見是否有當伏乞



皇上訓示謹

奏道光六年十一月二十五日奉

上諭御史賀照齡奏湖南苗驢驢云云着該督撫等嚴飭新任辰永沅靖道翟聲煥將撫綏

控制一切事宜務照舊定章程實力整頓勿任日久廢弛漸滋弊端以期保衛民生永

安邊防該御史摺着抄寄閱看將此諭令知之欽此 以上原文

鴻勳既讀原文而慨然曰屯防之初設如此經營籌畫屯防之既設如此補偏救弊杜

漸防微我

仁宗睿皇帝  
宣宗成皇帝

宸謨廣運獨斷於上雖以貴州疆臣之陳請而不爲之動內外臣工之言積弊言補

救者無不交議

酌准使此屯政不墮於百年以至今日而當日大臣如書麟祖之望實

奏開屯防邊以啟其事高杞以與情踴躍奏以圖其成阿林保以均屯告歲經久章程奏

景安以均屯未盡事宜酌擬完備章程奏聞以持其後廣厚以減租節用捐賠儲備奏

以善後而寬民且捐廉至六千兩之多大臣籌邊爲

國至於如此至於籌款生息因旱減租因弊陳言深維二三老成宏謀遠慮於數十年間

而乃成此局面豈惟傅壯肅一人之力哉謗書三篋樂羊歸功息壤在前樗里請命在聖天子君臨海內原不以此一隅邊畫自見

宸謨之善而湖廣畫臣與夫在京卿貳言官以經畫此事者固已周矣爰爲之頌以記其績  
頌曰懿鑠哉我

大清之有天下也雍正改流苗服息訝遠訖旄牛近收越馬黔蜀湘邊有地千里撫而柔之以民以子越乾隆六十年自作不靖誕敢違天大帥秉節

王師討征在嘉慶之二載以肅以清餘燼時作暇

王師之遄還鳳凰有守山陰傅鼎疊隘重關練兵飛走敢與塹環聞警則風馳電掣臨戎則破節滾花惟川之酉陽建官官後如內地之文華惟黔與楚蠟耳山間嘉動而紛有戰則克用無裨氛嘉慶之八年爰乃開屯以田養兵以兵衛民民土並用苗亦安身衰  
衰諸公巡撫三湘嘉謨入告荷

天子之龍光開始善後垂利於無疆自是至咸豐同治光緒以來事變繁興惟此事仍無大越於昔之定章蓋當日海內承平獨苗邊之緊要湖廣督撫惟是之籌謀精心果力以建大猷司寇侍御皆廟堂之忠蓋用垂敷奏以千秋敢作斯頌俾無墜於末流

永綏廳志卷之二十九

藝文門

直隸開州董鴻勳修撰

奏疏屯防類下附稟詳札議凡例

- 一此爲原文第六卷今次爲第二十九卷
- 一稟詳札議附於斯類原文如此今仍之
- 一屯防經營不易具見精心以稟詳爲最讀者其審之
- 一後半議論乃會屯防之全體而言之讀者其加意焉以見一時創始之功云



永綏廳志卷之二十九

藝文門

奏疏屯防類附稟詳札議目錄

查明苗疆事宜循照舊章實力整頓

籌議苗疆善後事宜十條

屯防經費不敷擬在漕糧節省項下籌款發給

士民公呈舉辦均屯永遠守邊

丈收永綏屯田及苗佔民田

夾單

鄉試另編字號取中紳士呈請詳題謝恩

苗備捐田完納各寨苗人每年應征額糧

嵩孚

康紹鏞

裕泰

陸費瓌

駱秉章

姚興潔

朱紹曾

本縣志  
撥田收租加增各廳縣書院義學經費

添設最深苗寨義館

撥田收租給苗疆生童試資

撥田收租爲各廟歲修時祭之用

撥給苗疆教職學田

苗疆教職毋許向新進生員索規禮

傅鼎

朱紹曾

傅鼎

朱紹曾

朱紹曾

傅鼎

朱紹曾

傅鼎

永綏廳志卷之二十九

奏疏 屯防類附稟詳札議

查明苗疆事宜循照舊章實力整頓

竊臣等承准軍機大臣字寄道光六年十一月二十五日欽奉

總督嵩 字 巡撫康紹鏞

上諭御史賀熙齡奏湖南苗疆自嘉慶初年戡定後辦理得宜近日漸就廢弛臚陳九款請  
敕該省督撫督令巡道實力整頓等語湖南苗疆戡定以來惟傅鼐前在辰永沅靖道  
任內時辦理屯防訓練儲備教養一切事宜俱稱妥善苗情極為安恬近日苗民向化  
已久該道員稍不稱職即不免有因循廢弛之弊若如該御史所奏沿邊礮卡聽其頹  
壞給丁田畝書吏受賄舞弊修里屯田工本款目雖存興修不實道標練勇雜作匠役  
挑補丁弁書吏勒索賄求差役人等動入苗寨滋擾書院義館幾同虛設及苗人違禁  
祭鬼或互相訐控勒贖各款實於邊防大有關係着該督撫等嚴飭新任辰永沅靖道  
翟聲煥將撫綏控制一切事宜務照舊定章程實力整頓無任日久廢弛漸滋弊端以  
期保衛民生永安邊徼該御史摺着抄寄閱看將此諭令知之欽此仰見我  
皇上惠愛民苗綏靖邊徼之至意臣等跪讀之下欽服難名當經飛飭新任辰沅道翟聲煥

星馳赴任令將御史賀熙齡臚陳各條逐一確查並遵

旨將查辨緣由先行覆

奏欽奉

硃批俟奏到時再降諭旨欽此欽遵在案茲據該道查明分條籌議由藩司裕泰覆核議詳請

奏前來<sub>臣</sub>等伏查苗疆自嘉慶二年戡定後前任辰沅道傅鼎一切籌畫控馭洵屬事事得宜迄今三十餘年苗情靜謐所有原定一切章程全在實力奉行隨時整頓庶幾經久不敝<sub>臣</sub>等到任以來勤加訪察屢飭該處道府廳縣毋以治安日久玩忽漸生茲據該道逐款詳查尚無廢弛情事惟是邊防固宜鎮靜經理猶在得人該道翟聲煥久任苗疆熟悉情形自上年抵任以來於屯防事務均能循守舊章實心辦理已覺日有起色<sub>臣</sub>等仍諄飭該道此後猶當益加奮勉實力整頓邊牆礮卡隨時修葺屯丁練勇認真訓練屯防經費慎司出納並督率廳縣各於所轄民苗妥協撫綏盡心教養仍飭嚴禁書吏胥差籍端勒索擅入苗寨滋擾務期化洽邊隅永臻靜謐以期仰副我

皇上綏輯苗疆之至意所有會查妥議緣由謹合詞恭摺具奏並將議覆現在整頓苗疆事



宜各款另繕清單敬呈

御覽

一據御史賀熙齡奏稱苗疆沿邊一帶修建牆堡礮卡哨砲各台籌有經費二千九百餘兩聞近來報銷不實坍塌者多宜亟加修葺等語臣等查苗疆鳳凰乾州永綏古丈坪保靖五廳縣沿邊及裏圍後路一帶於嘉慶二年以後經前道傅鼐修建汛堡屯卡礮樓哨台砲關門關廂共一千一百七十二座又修建邊牆一百一十里分撥兵丁常州駐守因建立之地多在高山峻嶺風雨飄零易於坍塌於屯防項下籌有歲修銀二千九百兩查自建設以來每年時有坍塌處所每修一處需銀數兩或數十兩至百餘兩不等各前道因限於經費將緊要應修之處隨時修理每年約修六七十座需用銀二千八九百及三千餘兩不等實用實銷並無浮冒惟原建礮卡一千一百餘座每年僅修數十座不及十分之一委係限於經費以致不能每年按座修理其裏圍後路各礮卡先因苗氛未靖建以防護近城以通糧運迨添建沿邊礮卡以後裡圍後路無關扼要久未修理以致日久頽壞臣康紹鏞到任後於上年春間會同前督臣李 札飭前護道逐加查勘將沿邊及裏圍後路逐加修整該道翟聲煥到任後親赴查驗均各派

有兵丁駐守<sub>臣</sub>等仍嚴飭該道隨時查察一有坍塌損壞立即修補據實報銷不得借稱經費不敷任聽損壞並查察兵丁不許擅離常川駐守以固邊隅

一據御史賀熙齡奏稱苗疆設立屯丁皆以附近礮卡之田撥令耕種聞近來屯防書吏因田有肥瘠受賄任意撥給往往有所守在此而所耕之田在數十里之外者致礮卡空虛無人看守宜於撥給丁田之時務與礮卡切近如書吏舞弊卽行嚴懲以收屯防實效等語<sub>臣</sub>等查邊疆五廳縣共設屯丁七千名內散丁每名給田六畝五分百總每名給田七畝五分共給田三萬二千六百九十畝俱在均出田畝內分別撥定內鳳凰乾州永綏三廳當日均出田畝居多屯丁六千六百名所授之田均於駐守處撥給俱係就近耕守惟古丈坪保靖二廳縣均出田畝較少且零星散在各處不能一律在於附近礮卡撥給是以該二廳縣屯丁四百名往往有所守在此而所授之田在彼者該屯丁或有召佃收租或自令子弟佃耕相安已久各屯田均已撥定實無可以撥換之田自應仍循其舊至屯田原有肥瘠不同前經傳籍攢造田形畫片畝分細冊將給丁田畝水旱牽搭註冊存檔至今憑冊稽查不能更移各屯丁事故出缺向歸廳縣驗補惟鳳凰廳百總總旗缺出由廳送道驗補卽以原田撥給田畝典售者經<sub>臣</sub>嵩前任

湖南巡撫時訪聞飭道逐細清查追田歸丁自耕分別懲治並嚴禁勿許再行當賣茲查屯丁田畝父子相承守爲世業此外遇有逃亡故絕缺出原照舊章查明應補之人分別驗補均以原田撥給卽於檔冊註明書吏旣不能弊換各屯丁亦不能私行當賣臣等仍嚴諭該道督飭各廳縣嗣後驗補屯丁務須恪守舊規如查有書吏受賄舞弊撥換及屯丁當賣田畝立卽盡法嚴懲以杜弊端而收實効

一據御史賀熙齡奏稱各廳縣屯防田土附近山溪每多山水衝壓原籌有修理田土工本穀三千餘石近開田土冲壓俱令佃戶自行修理無力興修聽其荒廢並額租逾限以牛隻作抵致悞春耕或另換新佃責令頂繳租糧種種滋累等語臣等查鳳凰乾州永綏古丈坪保靖瀘溪麻陽七廳縣共均屯防田土十三萬一千零六十四畝除分授屯長屯丁及老幼丁領耕外餘俱召佃收租以供經費苗疆跬步皆山溪水湍激均屯田畝遍布於山坡溪岸之間每當山水漲發田被冲壓事時有屯防項下籌有修理田畝穀三千零三十九石遇有冲壓隨時勘明修復核實報銷今檢查近年佃報水冲沙壓之案隨時飭委廳縣屯弁動項開修並照例免減租穀內有冲壓無多佃力自能修整經委弁議請無庸動項者亦有山水漫淹旋卽消退經委弁議請無庸修理者均

經核實報銷無從侵蝕亦無佃戶無力興修聽其荒廢至牽牛抵租查前道姚興潔任內據鳳凰廳屬各苗備弁請積貯穀一千石變價買牛二百隻分給苗佃領耕每牛一隻作穀五石分年繳還遇有欠租該管苗備弁將牛牽回抵繳租穀其無力還穀者稟請換佃將牛領耕此從前苗備中常有之事蓋由佃欠卽係牛本並非因田畝荒廢該欠租穀所致自道光元年清查減租之後佃力已紆應繳額租年清年款歷無牽牛抵租清事又新佃頂繳租糧一事查民苗佃戶內間有欠租不能完繳自求親族接佃稟知各前道舊佃情愿退耕新佃愿繳欠租所欠亦不過數石委係出自情願並無逼勒臣等查屯防經費出自田租必須經理妥善庶免滋弊應飭該道凡遇沖壓之田遵照舊章隨時動項開修實用實銷勿使侵蝕並督飭各屯備弁上緊收租毋任拖欠頂繳並嚴禁牽牛抵欠務期額租繳納不致短絀

一據御史賀熙齡奏稱苗疆練勇最稱精銳現在多以厨役匠作雜項充數坐使有用之勁旅徒屬虛名等語臣等查鳳凰廳原設練勇一千名留備攻戰按照營制分馬步戰守鎗砲弓箭籐牌各隊專派屯守備千把外委額外九員名管帶每年自七月初一日起至次年四月底止按三六九日勤加訓練此內原設百總十名總旗二十名小旗一

百名均係技藝嫻熟嗣後於散丁內挑選一百七十名共三百名加給鹽菜令其教習各丁遵守前道傳籛成規甚屬精銳素爲苗人所畏服道光元年清查案內

奏准於練勇內撥出一百七十二名作爲各屯備弁字職跟丁實有存在場練勇八百二十八名若以雜項人等充數多一冒濫冗丁卽少一操防壯勇於邊防大有關係該道翟聲煥到任後確查原設練勇實係足額並無厨役匠作雜項人等濫充間有匠作數名係修製弓矢縫紉衣甲之人其本身技藝各有嫻熟每逢三六九日俱在場聽候操演其跳高跋坡等枝照舊訓練除大操常操之外亦有時赴道署校閱臣等查訓練之設原以備攻戰之用雖查無厨役雜項等人充數惟匠作業兼手藝實碍操防應飭道查明革除另募壯丁補額務須循照舊章嚴行賞罰如有年力衰弱技藝庸劣者立即斥革至撥出字職跟丁係由練勇改本身技藝未便懈弛並令一律操演務使悉成精銳以期有備無患

一據御史賀熙齡奏稱屯丁內之百總總小旗及總散屯長遇有缺出向由各廳縣詳道頂補並不送道署驗看近聞無論遠近皆須親赴道署未驗之先守候需時既驗之後書吏勒索規費然後給與委牌報照又屯丁缺出向以該丁之子弟親屬頂補近則書

吏舞弊往往使應補者失業不應補者賄求又苗備弁例由辰沅道秉公拔補近聞亦有書吏受賄情求之弊等語<sub>臣</sub>等查鳳凰等五廳縣原設屯丁七千名內挑出小旗七百名總旗一百四十名百總七十名以資管束遇有百總總旗缺出惟鳳凰廳與道同城由廳詳送赴道驗補給發委牌餘俱由各廳縣補驗又各廳縣共設總屯長四十名散屯長一百六十名均有管倉之責遇有缺出向係由道驗補又各廳縣共設苗守備千把外委四百八十六名遇有千把外委缺出由各苗備擇其明白曉事之苗弁苗目送廳縣驗明詳道轉詳拔補內鳳凰廳各苗備弁並各廳縣苗備千總二項送道查驗餘俱由廳縣詳補並不送道是皆循照舊章並無更改至屯丁補缺係驗均田之本戶及出力之丁勇挑補嘉慶十九年永綏廳攙越補丁之事於道光元年清查案內

奏明撤退將田驗給應補之丁以後均係遵照舊章凡遇屯丁缺出卽以該丁之子孫弟姪親屬頂補間有民人求補丁田並屯丁呈請加補均查對存檔册藉果係有業歸公並從前著有陣亡勞績者總册記名作爲餘丁遇有逃革故絕丁缺卽以此項餘丁挨補其間頭緒較繁書吏受賄情求上下其手洵非事所必無查嘉慶二十二年暨道光二三年間有捏告舞弊之案均經前道審明分別懲處<sub>臣</sub>等會飭該道督率各廳縣慎

守舊章凡驗補屯丁務須秉公拔補一切委牌執照當堂給發不許假手書吏如查有需索勒指之事立即盡發嚴究以期剔除積弊屯政肅清

一據御史賀熙齡奏稱近聞漢民與苗人往來不無盤剝之弊遇有干涉苗人事件地方官輒差役往提任意需索甚至擅行鞭責詈辱苗弁等語臣等查原定章程苗人詞訟案件即令苗弁傳送不許兵役入寨道光元年清查案內復經

奏明嚴行飭禁至漢民不許擅入苗地私爲婚姻久奉飭禁各處集場交易令各屯弁親往彈壓不准市僧侵欺原所以區別民苗使之兩無嫌隙洵爲杜漸防微之道今查自平苗以來各廳縣遇有苗人詞訟案件概令苗弁傳送從前有差役擅入苗寨均經各廳縣盡法嚴懲臣等飭諭該道督率廳縣務遵禁令倘有不肖兵役私入苗寨藉端索擾立即嚴拿究辦出示申明嚴禁漢民私人苗寨私爲婚姻以及盤剝侵佔責成該道苗備苗弁稟報拿究並令按季出具無漢民擅入苗寨切結由廳縣加結賚道備查各處集場交易仍令屯汎員弁彈壓毋許市僧侵欺並移鎮協轉飭各營汎一體飭禁以期邊隅永臻安輯

一據御史賀熙齡奏稱苗人向有椎牛祭鬼之習嘉慶初年業經禁止近聞此風復起宜

貴成苗弁查禁等語臣等查苗人疾病災眚向延巫師私宰耕牛聚衆禳解名爲作鬼  
自嘉慶十二年

奏明禁止之後歷年以來各廳縣苗人咸遵禁令誠恐日久玩生此風復起飭令該道嚴  
切申禁並督飭各廳縣及苗備苗弁各就所管之寨實力稽查如有苗人椎牛祭鬼立  
卽督同寨長將本犯及巫師並附和人等送該管廳縣究治倘苗備苗弁及寨長扶同  
狗隱或親身自犯一經發覺立拿詳革治罪仍於每季由廳縣取具切結加結送道備  
查如該廳縣失察狗縱分別詳參以肅禁令而靖苗疆

一據御史賀熙齡奏稱鳳凰永綏二廳與黔省接壤苗地處處可通苗人或爲舊時姻婭  
或因集場交易勢不能禁其不相往來其間偶有閒隙因而互相訐控或因錢債細故  
強牽牛隻或拿人勒贖抗不退還告官關提亦不到案應隨時會同黔省委爲查辦等  
語臣等查苗人向化已久咸知畏法並無拿人勒贖之事惟鳳凰廳西南與貴州銅仁  
府交界西北與貴州松桃廳交界永綏廳之西北亦與松桃廳接壤谿連峒錯處處可  
通苗人舊有姻婭或因集場交易勢不能禁其相往來其間有閒隙卽不免有互相訐  
控之事若關提不到案應隨時查辦以息爭端凡遇貴州關提之案飭令苗備苗弁迅



速傳送移解上年黔邊收繳鎗刀亦各親往彈壓會同辦理遇有關提黔省之案亦經隨時移解凡兩省苗人交涉之事應歸犯事地方審理亦有應須會商之處飭令該道督率該廳等遇有彼此關提之案務於文到五日內傳齊移解或因案情較重人數較多難於移解卽移會各集人証訂期於交界處所會審斷結如有偏徇致苗情不服別滋事端該道卽稟揭另委賢員會審務使泯其畛域之見則苗情服而仇隙自消邊境益臻安謐現移咨貴州撫臣轉飭銅仁府松桃廳一體和衷以期共濟

一據御史賀熙齡奏稱苗疆各廳縣設有書院苗館原使一體讀書咸知禮義近聞各處書院有以官親濫居師席者有坐支束脩終年不到館者其屯苗義學教讀之人向由辰沅道考取近則或由屯長保送坐分束脩而義館亦爲虛設是宜選擇端人實心教讀以收化民成俗之効等語查鳳凰乾州永綏三廳瀘溪麻陽保靖三縣各設書院一所分設屯義學五十館苗義學五十館束脩膏火皆於官贖田租項下取給令各廳生童並屯苗子弟一體讀書每逢朔望宣講

聖諭廣訓以資化育各書院掌教向由辰沅道延請品學兼優之人屯苗義館則歸各廳縣慎選師儒考取報道均係各廳縣廩貢生員既取其學問之優長復便於口舌之相習如

有課讀不力成效無聞者隨時更換歷經遵照辦理現查各書院並無官親濫居師席及終年不到者其屯苗義館係各廳縣考取館師報道並無屯長分修等弊臣等查設立書院義學原使講習詩書以致教化既據查明并無曠誤飭令該道諄致掌教傳諭館師務須循照成例實心訓迪各書院每逢考課即將文卷賚道細心校閱繕榜曉示給以獎賞并責成各廳縣就近查察認真課讀以收實効此外尚有鳳凰乾州永綏保靖四廳縣於嘉慶十五年增設深渠苗義學二十館并令分飭一律照辦毋任墮廢籌議苗疆善後宜事十條

總督裕泰  
巡撫陸費瑒

竊照湖南乾州廳痞苗石觀保等合款抗租焚搶滋擾抗拒官兵業將首夥各匪犯解省審辦由臣等核議具

奏定案所有一切善後事宜經臣陸費瑒附片

奏明會商督臣督飭道廳妥為籌議並經臣裕泰札飭司道會核詳辦各在案查苗疆邊

防屯政均關緊要一切章程必須興利除弊隨時整頓斟酌妥善方可期經久無弊茲

臣等督同藩司萬貢珍臬司程煥采辰永沅靖道呂恩湛體察苗情悉心查核除永綏

鳳凰二廳被擾各良苗前經臣陸費瑒會同臣裕泰

奏蒙

恩旨賞給將種穀六千石又經臣裕泰籌發銀二千兩復經臣陸費瑯查照年例

奏借苗疆五廳縣各丁佃將種穀一萬五千石均交該道督飭印委各員按戶核實散放

現在苗衆耕種有資安常樂業極爲靜謐又各廳縣水衝沙壓田土前經臣等

奏准清查分別豁除租額給資修復并將其餘屯租酌議輕減以示撫卹惟查自均田以

來四十餘年各丁佃原授田土難保無轉輾撥佃現種之戶大半並非原業必須按畝

履勘查明現在承種戶名分別減豁方可實惠均沾茲已飭據各丁佃各將田土開明

頃畝四至具報廳縣聽候委員會同查勘因現值農忙之時青苗遍野恐傷禾稼難以

丈量應請展至秋收後再行逐段勘明確核應豁應減租穀實數另行妥議具

奏以昭核實外其餘應沿應革事宜經臣等訪察現在情形參以從前例案其中有應酌

改舊章者有應明定限制者有應嚴申禁令者有應酌加體卹者逐一會核妥議按條

臚列恭呈

御覽伏候

聖裁

一裁汰經費以歸節省也查苗疆屯田歲收租穀爲屯防一歲經費之需現因屯田多被水衝沙壓應須豁減租籽欲議減租必先節費庶幾用款無虞支絀第屯防經費歲有定額並有原額所無歷久相沿捐貼視同成例之項驟議裁減亦甚不易惟查苗疆從前原

奏設立屯苗義學一百館教課苗童嗣於嘉慶十五年復又添設苗義學二十館以期廣爲訓迪數十年來各苗生童涵濡

聖化父教其子兄課其弟多能自行勤學原設苗義學一百館足資課讀所有續添苗義學二十館應行裁汰每歲可節省穀四百七十二石又屯防籌款項下有滙辦七廳縣均屯總局委員書役薪水工食等項穀九百二十七石六斗查辦屯委員久經裁汰惟總局有庫貯均田授畝各項冊檔及均戶典買田土契據等項乃須書役經管應酌留工食穀一百四十石其餘穀七百八十七石六斗亦可核刪二共裁減穀一千二百五十九石六斗此外實無可減之款此項裁減穀石應請留充屯防不敷經費之用按年彙冊報銷

一佃戶完納租籽合勺尾數應明定限制以杜浮收也查歲收租籽顆粒皆出苗佃膏脂

豈容浮取乃向來屯長斗級人等遇有合勺尾數輒將兩手捧量爲一合一手撮量爲一勺實屬積弊若將合勺全裁不准收取則爲數較多勢必有虧正額自應折中定制以示平允應請嗣後佃戶完納租將穀尾數在六合以上者進取一升五合九勺以下者退出不計責成承催之屯備弁認真稽查倘屯長人等仍蹈前轍卽稟該管廳縣從重究懲如該屯備弁通同浮取查出一併斥革究辦各佃輸將自必益形踴躍矣

一屯田征租執照應改用各廳縣印信以昭慎重也查苗疆屯防征收租穀向來各佃戶交租後卽由承催之屯備弁給予收條既不蓋用廳縣印信又無三連板竄截存備查每致稽核無從難免重征多索之弊臣等伏思屯田租穀爲邊防經費要需本與正供無異所有征租執照紅簿嗣後應改由各廳縣蓋用印信一如征收錢糧之法悉用三連板竄如遇佃戶交納租穀卽行裁竄給領庶足以備稽核而杜弊端至屯備弁承催督催向視勤惰分別記功記過雖經定有章程奉行已久惟近年各屯備弁每視功過章程爲具文不免心存玩泄應責成各廳縣實力督催隨時稽查如屯備弁催征不力年終核計欠數較多卽行從嚴稟請分別降革倘各廳縣視爲無關考成並不認真督催亦由該道詳請核參以重經費

一苗人款頭名目應永遠禁革也查民間如有不便之事原許稟官出示嚴禁乃近年乾州苗人輒於各寨議立款首私議款單違者議罰迨後倚恃款衆把恃公事武斷鄉曲報復私嫌上年石觀保等竟敢夥款抗租焚搶苗寨釀成巨案現雖將首從各犯悉數就獲分別懲辦邊圉一律肅清第恐日久玩生復萌故智不可不嚴行申禁嗣後苗民如有戶婚田土口角鬪毆賭博姦盜等事卽赴該管廳縣呈控立予秉公審斷不許赴佐雜衙門及苗官控訴該佐雜苗官亦不得違例擅受並不許從中攔阻及苗人私自武斷議罰以杜後患並責成苗官隨時稽查如所管寨內有苗人議款情事卽赴廳縣呈報嚴拿究辦倘該苗官隱徇不報事發斥革一併究懲仍飭辰沅道於每年冬令將禁革款頭名目及佐雜苗官不准擅授苗詞緣由剴切出示曉諭一次俾苗民共見共聞咸知凜戒如查有佐雜苗官擅受需索由該廳縣分別詳參究懲不得稍有徇縱一收繳鎗械私採硝磺應責 官查報也查苗地跬步皆山防捕野獸守護田禾各戶率皆置有鳥鎗器械嘉慶初年平苗善後案內雖經官爲備價收繳鎗械而藏匿尙屬不少未能淨盡歷年各廳縣俱責成苗備弁查禁不許再有私造等事無如苗人習用已久亦難免陽奉陰違此次查辦善後已據各廳縣收繳鳥鎗刀械五千七百餘件解省

驗發省標各營分別存毀並據各廳縣取具並無隱匿甘結申報第恐搜查仍有未盡又苗疆出產硝磺處所距內地窻遠差役例不准入苗寨無從查察查硝磺係軍火要需自應一併嚴禁嗣後苗地如有私造私藏烏鎗器械並私採硝磺製造火葯者均責成各廳縣督率苗官稽查舉報如苗官知情隱匿與本犯一併治罪倘苗官已連犯稟送廳縣而廳縣意存消弭不爲嚴辦並奸民私入苗寨買賣硝磺由內地別經發覺者將該廳縣從重叅處

一苗官賢否宜核實甄別以示勸懲也查苗疆各廳縣額設苗備弁原祇令其催收租穀及緝捕勾攝苗案犯証並不准擅受苗詞近年苗官中辦事得力者固不乏人而庸劣玩違亦復不少不可不加以甄覈應請嗣後除苗把總外委仍照舊例於年終核實甄別一次責成該管廳縣留心稽查如果勤慎秉公約束散苗安靜承催租將全完者卽將該把總外委列爲一等予以超擢如係苗千總在任已歷五年辦公妥協並無過悞卽行拔補苗守備如係苗守備在任已歷五年辦公妥協無悞由道詳請記功一次再歷三年如果仍前勤奮始終不怠由道詳明俟屆巡閱營伍之年歸於查看苗疆情形

案內

奏請賞加都司升銜以示鼓勵其止循分供職者列爲二等俟次年再行甄別如有擅理苗詞需索苗衆及或怠玩悞公催租不力該管廳縣立即按其情節輕重分別記過責懲降革辦理似此明定勸懲庶苗官知勉知慎力圖振作於苗疆大有裨益

一歸併屯倉裁汰屯長以節冗費也查苗疆鳳凰乾州永綏古丈坪保靖麻陽瀘溪七廳縣共設屯倉一百二十六所原設總屯長四十名每名授田十五畝散屯長一百六十六名每名授田七畝五分由道散給委牌飭令經理屯倉事務從前歲收租穀十萬五千四百餘石爲數較多不能不興設屯長分司其事自道光元年

奏減租額每年收穀七萬九千二百餘石較原額減至二成有餘租數既少自可將屯倉就近歸併屯長酌量裁汰而一切修倉等項費用亦可撙節現據辰沅道查明各廳縣屯倉相近者二十三所可以歸併作爲十倉計撤去屯倉十三所裁汰總屯長四名散屯長十六名共二十名按照原額屯長已裁一成之數共撤去原授田一百八十畝應請仍給該屯長佃種俾免失業而按例完租亦可稍充經費

一苗官劄付應分別鈐印給發及由道繕給以歸簡易也查苗疆鳳凰永綏乾州古丈坪保靖五廳縣共設苗守備千把總外委共四百八十六名向由廳縣保送辰沅道驗看



詳由督撫臣及提臣會印給劄原所以昭慎重第查道標屯守備弁拔補章程把總由道考驗詳請咨部給劄外委額外由道給委至把總升補千總詳送撫臣考驗千總升補守備詳送督臣考驗歷久遵行在案今以苗備弁之微末而自外委以至守備均須詳由督撫臣移提臣會印給劄事涉煩瑣應請嗣後拔補苗備弁援照道標屯備弁之例苗外委苗把總由辰沅道給劄苗千總劄付詳由撫臣鈐印頒發苗守備劄付詳由督臣鈐印頒發以歸簡易也

一每科鄉試取中邊字號田字號民苗舉人應酌給會試盤費以免派累也查鳳凰乾州永綏保靖瀘溪麻陽六廳縣邊字號舉人會試歷照前任辰沅道傅鼎舊章由道捐給銀四五十兩不等並勸令屯苗兵勇每名幫銀一錢或穀一斗以作路費至田字號苗舉人赴京會試於道光元年

奏准照本省民舉人例給與公車銀兩之外再由道酌給盤費由是苗舉人會試亦勸兵勇等每名幫穀一斗近年屯苗兵勇生計維艱力難照舊幫貼而該舉人赴京會試道遠費繁艱於設措誠恐阻其向上之心自應酌議津貼以示體卹而免派累查屯防項下有歲支加增書院義學穀六百石一款應請每歲撙節穀三百石留於鄉試之年幫

給民苗舉人每名穀二百石由該管廳縣詳道給領如遇

恩科中式舉人一體照給其支剩之數歸於屯防年例支銷案內核實造報所有屯苗兵勇幫給銀穀之處永行禁止其由道酌捐路費舊章亦毋庸再給

一新舊佃欠租穀請分別豁免帶征以紓佃力也查鳳凰乾州永綏古丈坪保靖麻陽六廳縣自道光二十一年起至二十六年止節年據報佃欠未完穀共一萬二千五百五十餘石又二十七年應征屯租內除被旱被蟲無收穀三千一百八十餘石已經臣陸費琮

奏准緩征外尚有未完穀二萬九百五十餘石疊經辰沅道勒限嚴追無如苗疆田土本屬瘠薄苗人終歲勤動所獲無多在豐稔之年完租以外已鮮蓋藏一遇歉收更形匱乏是以歷年不無帶欠瞬屆秋收又有應完本年租穀若將各年積欠同時並征佃力實有不逮溯查嘉慶二十四年道光十八等年均因屯佃積欠催追無完經前任各督

撫臣

奏准分別豁免緩征在案合無援案仰懇

聖主逾格

天恩俯念苗佃窮苦實情准將鳳凰乾州永綏古丈坪保靖麻陽六廳縣道光二十一二十二二十三二十四二十五二十六等年佃欠未完穀一萬二千五百十餘石概予豁免並將二十七年佃欠未完穀二萬九百五十餘石緩至二十九年分作三年帶征以紓佃力所有屯防項下當年不敷經費亦照歷辦成案在於儲備穀內撥用其清豁之租現經臣等另摺

奏請籌款歸補以實儲備

以上十條均關屯防緊要臣等督同司道悉心核議往返札商意見相同謹合詞恭摺具

奏是否有當伏候

皇上聖鑒訓示謹

奏道光二十八年

屯防經費不敷擬在漕糧節省項下籌款發給

巡撫 駱秉章

竊查湖南苗疆地方自嘉慶初年勘定後勸諭紳民均捐屯田歸公招佃耕種納租解

交辰沅道以供官勇俸餉及一切經費歷係銀穀兼支每穀一石定價銀一兩乘時變  
糴支用嗣因清查減租不敷支放經前督撫臣設法籌補

奏准將司庫銀十萬兩發交鹽商生息每年由兩淮鹽商解交生息銀一萬二千兩遇閏  
加增一千兩又漢商每年捐銀一千五百兩巡撫司道年捐銀一千兩以資貼補茲金  
陵漢口均爲賊踞漢岸商人星散無憑飭繳巡撫司道公捐之項亦因養廉減成尙未  
捐齊以致經費缺乏每年短絀銀一萬四千三百一十六兩零前據護辰沅道翟誥稟  
請由司籌給臣因時局艱難制用孔棘自須力求樽節俾免虛糜當飭將苗疆應發各  
款酌量裁減去後旋據議將歲修碶卡工料賞賚催征出力屯長花紅屯苗義學三款  
銀三千四百二十兩暫行停發其餘各款難以概行停止據該護道咨據藩司徐有壬  
糧道謝煌於無可裁減之中權其輕重緩急量爲核減又據將修理水冲沙壓田土工  
本及貼補屯佃租穀三千三十九石內擬請減穀一千石實支穀二千三十九石屯苗  
義學二十館並加增館穀除已節省外尙應支銷三百四十四石內擬減穀一百四十  
四石實支穀二百石乾鳳永保四廳縣儒學薪水穀四百石擬減四成穀一百六十石  
實支穀二百四十石七廳縣民苗生童試資穀一千石內擬減穀四百石實支穀六百

石五廳縣並佐雜辦公穀二千二百四十石擬減四成穀八百九十七石六斗實支穀一千三百四十六石四斗各倉風晾鼠耗應支穀八百五十石擬減穀二百石實支穀六百五十石該道巡歷五廳縣夫馬賞號穀一千石擬減二百石實穀八百石以上共減穀三千一石六斗照依苗疆章程每穀一石作銀一兩計減穀折銀四千一兩六錢計實短絀屯防備弁練勇俸餉等銀七千八百九十四兩四錢除公捐鎮筸經費銀一千兩有款不計外每年實不敷支發銀六千八百九十四兩四錢閏年加增銀一千兩惟咸豐三年九月以前經費在未經裁減之先仍照舊支發共應由司發銀一萬一千餘兩爲期已逾礙難刻緩查苗疆練勇素稱精銳居則捍衛邊陲足資固圉出則疊從征戰所向有功洵爲

國家勁旅倘用其力而不恤其勞責其効而不籌其餉似不足以鼓舞戎行勵其敵愾且查屯防備弁練勇俸餉卽與綠營兵餉無異未便擬裁而司庫正雜各欸因值辦理軍需久已挪掘一空實無款可發惟查湖南漕糧現已停運折價該糧道庫內每年計可節省行月修艚毛竹及收買晒颺米價等銀係在漕米折價之外似可通融酌撥所有三年九月以前應發苗疆經費銀一萬一千餘兩卽在節省行月等銀項下提撥銀八

千兩並於司庫防堵經費款內動支銀三千五百兩發給該護道收領濟用至咸豐三年九月以後起每年苗疆俸餉不敷銀六千八百九十四兩四錢遇閏加增銀一千兩應請在於司庫及糧道庫節省等款內通盤籌撥藉資接濟一俟逆匪蕩平運道肅清漕糧照常起運鹽務仍復舊章則苗疆生息等銀自可照案解繳供支而節省之運費亦可照舊歸於漕糧濟用兩無所損而於目前苗疆經費似覺大有裨益再道光元年苗疆清查案內有書院束脩等銀一千一百二十兩已飭照數改發穀一千一百二十石合併陳明臣為苗疆經費缺乏起見理合恭摺具

奏伏乞

皇上聖鑒

勅部核覆施行再兼署湖廣督臣楊需曾否到任未接咨報是未及會銜謹

奏  
咸豐四年

士民公呈舉辦均屯永遠守邊

具呈永綏廳生員艾建詢宋大章吳基張高仁楊濬合廳士庶人等為公懇舉辦均屯永遠守邊事竊永綏一廳逼處苗巢田土本屬無糧又因汛少兵單於乾隆六十年苗

匪不法越界佔種迄今九載未能復業茲蒙

憲恩會同

本府主王 暨

署浦市分府姚 並文武委員於沿邊一帶建礮築堡鞏固藩籬稟奉

大憲

奏明舉辦屯務酌挑壯勇二千名分布防守俾痞苗無從入邊強佔田地收復分給民勇一體屯耕約計需用一萬一千餘畝實爲久遠捍患之至計舍此別無良策生等具有天良莫不感激涕零情願遵照

奏案聽候辦理不敢妄爭田地自取咎戾理合出具甘結公懇

大老爺台前俯電輿情賞准照辦沾 恩無暨望 光上呈

稟令辦永綏均田民苗綏輯

敬稟者竊永綏一廳自戡定以來因汛少兵單田地被苗佔種經將民戶酌徙來鳳龍山二縣外餘俱未能復業仰蒙

前制撫憲體察今昔情形於會籌移駐廳協及查覆苗疆均田案内

奏明安設營汛建礮築堡酌挑壯勇二千名分佈防守彼痞苗無從入邊強佔將田土清丈分給民勇並現住邊內之向化良苗一體屯耕防守以歸周匝卑職鼎前於永綏移城之後因沿邊汛堡正在修建稟請仍遵原

奏俟邊備嚴密之日善爲舉辦先劃界限次清田畝各等因在案茲查本年入秋以來花園茶洞一路礮卡工程將次全竣籬籬既固足資控制應卽清釐界址收復田土挑丁屯種以實邊防卑職鼎於九月下旬馳赴花園會同卑職廷瑛署浦市通判姚興潔並護鎮

協營暨各委員等秉公集議查各里民地被苗佔種有年難必無頑梗之若不爲阻抗並恐勾串苗弁保甲假立契券隱匿田畝種種滋弊而應挑丁二千名需田一萬餘畝須將被佔之田全數清回方可均分屯守倘衿民藉以復業爲名不顧邊防大計執持舊產紛紛混爭或以遷赴來鳳龍山混求安插私收涉訟是欲其得所而轉以滋衅俱應先爲開導使民苗激發天良一體遵辦然後持以平允庶可久遠相安卑職等連日傳集屬屬衿士保甲竝六里苗備弁目宣示

奏案分別剴切面諭旋據閩廳衿民業戶張高仁艾建洵吳基宋大章楊濬等環庭公懇呈稱伊等產業本屬無糧久被苗佔據不能耕管今蒙固圍修邊將田土收復於各里



民戶內挑出了壯分給屯守徒此黎庶皆獲棲耕之所邊疆遂有磐石之安久之民氣日強自可存立此皆

皇恩

憲德格外矜全爲合廳籌大局地方計久遠我等何敢貪業安爭致罹咎戾又據上下六里苗備張子貴吳老沙帶領弁目等百餘名呈稱各里散苗佔種近邊民業弁目等不能約束以致數年總未查辦茲於沿邊密安營汛礮堡將田土清出歸公屯勇在散苗等也知普天之下莫非

王土從前原不應佔種得蒙恩施不加追究已屬萬幸何敢仍思覬覦自取重罪弁目等情願傳諭令其退出聽候清丈如敢抗違稟請嚴辦等情並據該衿民苗弁飲血盟誓各具切結前來察其情辭似皆實已甘服卑職等復爲議立規條定以賞罰使之互相激勸實心經理今定於初三日飭令委員得騰營知事高誠協同候補直隸州州判鄭人紀署經歷茅並素習苗情之守備李可仁千總曾彪把總盧升郭金章等先自礮卡以內分段丈量再由沿邊近邊逐處清查其佔地苗人查明如係有業可歸及其人向係狡悍不甚安分者不便任其住邊俱酌賞搬費令各該管苗弁帶回原寨分別安置

妥爲管束其住邊日久尙屬向化者或就近量給山地俾令墾種或卽令佃種屯田必使不致失所乃可相安其有本係民業被苗賤償當買亦卽籌款給價丈收歸屯以杜訟端一面將應需屯丁於有業無業各民戶及素日出力之鄉勇內照數挑出務取年力強壯堪資捍禦者分田耕守以收實效再查沿邊建修望堡十七座業經完竣並造成丁勇房屋一千間卽應派撥居住但甫經挑丁尙須團練而處處毗連苗寨誠恐風鶴驚心且清田伊始猶應防護加<sub>添</sub>庶免意外之慮<sub>卑職</sub>已密調<sub>卑職</sub>廳備戰練勇五百名暫赴各堡分劄不動聲色以資彈壓而消釁隙俟布置既定卽行撤回<sub>卑職</sub>等仍當督率委員駕馭苗弁一切特以慎重不敢稍涉輕率以期民苗從此綏緝鞏固屯防

上副

大人體

國籌邊之至意所有會議辦理緣由合先肅稟伏乞

鈞鑒訓示除稟

憲外

<sub>卑職</sub>謹稟  
<sub>廷瑛</sub>

丈收永綏屯田及苗佔民田

<sub>恭</sub>稟者竊<sub>卑職</sub>等前將舉辦永綏屯田民苗綏緝緣由肅稟馳呈計邀

賜覽嗣經親身督率原派委員帶領衿土苗弁里保甲弓書算手先由花園附近之豐和假  
明等寨將被佔民田向西挨次勘丈各寨苗人俱皆貼服並無異詞卑職將應辦各  
事宜量爲布置卽於十月十二日會同卑職延瑛通判姚興潔移駐茶洞惟是此一路道  
里綿長應屯田畝坵段畸零凡有民苗壞地交接之處俱應逐一清釐妥爲分割以免  
輻輳若非分頭辦理不能迅速又添派茶洞知事周應元外委宋效郊楊通佐張宗武  
周運仲額外滕士成白茶洞以北由老石山立樹小寨等汛向東查丈使之細心稽核  
仍計日集數剋刻儻辦旋據各該委員將礪卡以內應屯田地全行丈竣計獲田七千  
餘畝查此一路屯丁二千名共需田一萬餘畝加以將來安設屯官及歲修礪卡製備  
子葯辦理積貯一切等事又有出業最多之戶尙須照鳳凰廳都吾等約章程酌留十  
分之一此外尙有辦事總散屯頭與夫各里失業老弱孤寡並陣傷殘廢勇丁皆須有  
以養贍必當另備餘田數千畝今正數尙屬不足安能敷辦卑職等復與姚署倅並護  
鎮協營覆加集議此間議辦屯田先自礪卡以內次及沿邊近邊茲內地田畝業已料  
理就緒其礪卡以外者卽須乘時接辦查自茶洞以南之八排寨由磨腦潮水溪至米  
糯一帶係永綏西面沿邊與黔汎礪堡一溪之隔南接芭茅坪新設汎卡必應一律均

出田土建立堡座以固藩籬而聯聲勢而隆團葛壠一帶緊貼花園吉峒坪等俱係六  
理近邊地方其中民田亦應查明佃給苗人耕種按年納租以資養勇卑職等於二十  
二日督率委員赴各該處一一屢勘親向各苗剴切曉諭均當遵服當即派令州判鄭  
人紀知事高誠及奉委苗疆差遣之候補從九品管景牧會同守備李可仁千總會彪  
把總盧陞外委田宗富張國柱將米糯隆團各田畝以次清查丈約計前後得田一  
萬三千餘畝但各處田地俱係僭緊辦理頭緒繁多未經細核須令原派委員仍赴各  
處查明應給良苗屯耕窮苗佃種者分別撥給其係苗人賤價當買者着令呈出契紙  
照數給價並劃分坵段再加復丈將田畝確數一一清出至復丈之後即須將田形弓  
口畝分及地名四至段落隨時載入底冊以便臨田比對按圖逐卡分授各丁並照此  
攢造鱗冊已交候補訓導王占魁同州判鄭人紀查辦卑職等於本月初七日回至花  
園將花園茶洞及各處民戶逐一傳集分別有業無業詳加挑驗連日共已挑得壯丁  
二千名造入清冊刻下各民堡業已竣工房屋亦經修造一千間未便閒曠先將已挑  
各丁分派安劄暫行籌給口糧並令鳳凰練勇護送歸里一面陸續置備鎗械牛具將  
種及時按丁授田屯守現今民情踴躍 情安靖天氣清明正可督同趕辦不任延緩

卑職等仍隨事悉心妥議務期民苗相安仰紆

慈厯所以丈收田畝及分別償辦緣由合肅具稟伏乞

鈞鑑除稟

憲外

卑職兼  
廷瑛謹稟

夾單

再稟者永綏均出屯田其碼卡以內者分授勇丁及久居邊內向化良苗屯耕如弭諾隆團等處雖係沿邊近邊究在碼卡以外勇丁不便往耕仍佃給苗人承種交租所有碼卡以內佔種田地之各寨苗人原議酌給盤費交苗弁領回原寨分別安插旋據各該苗弁等稟稱發回苗人內有本寨並無業產者若聽其閒散勢難管束且各寨皆有苗種民田擬令各苗分出與之夥同耕作但弁等傳諭不能遵行發回各苗亦不敢據種卽令往耕必致滋畔惟求履勘分撥方能相安卑職等查各里地方民田甚多現在雖係散苗佔種每每彼此互相爭奪本無常主且有力所不及拋棄荒蕪者自應爲之清釐作爲官田令發回苗人與本寨窮苗分種不惟現今回寨各苗可以安業而一經官爲分定卽本寨之人亦免分爭且土塘苗兵將來屯防完竣卽應全撤其中無業窮

苗必須妥爲安頓亦當乘此預留地步而各苗既種官田仍與苗兵無異設遇緩急亦可調用實屬均有裨益卑職於勘查弭諾隆團之便先將五六里地方清出令苗弁等將應歸該二里苗人一一安置其七八等里距邊較遠現在遴派最熟苗情之知事高誠守備李可仁把總盧陞等前往逐寨體察總期經理妥協苗衆情願可以行之久遠仍令各苗飲血具結後卑職等再行親往慎重查辦肅此附稟統乞

慈鑒

卑職 廷瑛

又稟

鄉試另編字號取中紳士呈請詳題謝恩護辰沅道姚興潔爲邊學另設中額恭謝

天恩呈請詳

題事案據鳳凰廳同知姚興潔著乾州廳同知李方毅永綏廳同知胡如沅保靖縣知縣高誠會詳據紳士趙地靈包明漢曾世崧蕭榮科胡學文饒學文尙法型鄧士儼向昕饒柱何楷艾建洵鄧之桐朱煊姚柱吳太勳胡大魁黃長錫黃士莊賈云章等呈稱欽惟

聖治光昭四海戴

生成之德

皇恩遐布萬方慶登進之榮棘闈榜放春秋搜俊良而入選省會地分大小衡材藝以題名  
既中多中少之殊程亦因地因材而設額

聖天子振興文教

嘉惠士林

典至隆也

恩至渥也生等地處五溪之徼學踈二酉之藏亦慕登雲無奈月宮路遠未工織錦敢云日

色目迷歎鸚薦之無期邊境之文星似暗當苗氛之初靖藝林之學殖更荒仰蒙我  
皇上耆定武功

誕敷文德干戈戢則禮樂以興屯防周而膠庠徧設千餘座礪樓前後咕嗶相聞七百程寨  
落生童扶搖有志欣荷

恩逾恆格

俯俞入告之謨

澤沛荒隅

廣闢升騰之路編號邊田兩字

特恩及一縣三廳取材無酉二溪中額殊四州九府邊士三十名應試定分蟾窟一枝苗生  
三五輩赴科亦附鹿鳴一座此我

國家作人之

盛典邊防下士之奇逢也從此虎變溪山趨風雷而燒尾魚遊峒水得雲雨而揚馨巖疆播  
紅杏之吟鳥道有青雲之級此日窮邊草木

栽培盡南國榷楠當年礙道荆榛次第作春官桃李生等素切龍門之願幸沐



甄陶仰承

鳳詔之頒益加淬礪所有生等感激下忱理合具呈叩請俯賜據情轉詳具

題施行等情據此該卑職鳳凰廳同知姚興潔署乾州廳同知李方毅永綏廳同知胡如沅

保靖縣知縣高誠會看得該士子苗生等籍隸楚邊躬逢

盛世恥居僻陋莫鍾靈淑於山川快覩威儀初幸湔洗夫心面欽惟我

皇上義圖延慶

軒紀綿麻

聲教覃敷化行禹甸周原而外

文章丕煥光被堯天舜日之中說禮樂而敦詩書荒徼之儒風乍振遊黨庠而歸術序新流  
之學業方勤乃志切探花咿唔粗解文非拔萃瑄瑄徒磋何幸

聖量恢宏

皇恩霑霽率舊章於甯夏潛溫黍谷之吹仿成例於台灣同燒龍門之尾材慚樗櫟合澧蘭  
沅芷而敷榮質類砥砢偕和璞楚珩而增耀從此香分月殿看衣白苧之衫亦得試赴  
春官翼食紅綾之餅實出

殊榮之作育誠爲

異數之遭逢茲據紳士等具呈前來理合據情詳請咨

題等情到道據此該卑職兼護辰永沅靖道鳳凰廳同知姚興潔覆看得各該廳縣士子  
苗生等欣逢

景運幸際

熙朝沐

聖教之涵濡濯磨有自荷

湛恩之汪濊頂感難名欽惟我

皇上醴化覃敷

大鈞洪育含

太和而保合

德懋作人觀

文治之光昌

典隆造士苗疆底定旣賣劍而買牛屯政初開復橫經而負耒雖未工雲錦青衫則歲歲堪

憐錯織機梭花樣則年年難合何幸量材錄取簪盍甫陳

逾格搜羅

堯俞卽下人雖魯樸無虞葑菲之遺學本荒蕪得與參苓之選數百里榛區徃境氣翊風雲  
千萬年僻壤荒陬光開日月榷楠杞梓都成楚國之良珪璧璠瓊盡是荆山之美此固  
八埏九宇共頌

皇仁豈惟二酉五溪益加鼓勵

卑職

忝膺邊要恭奉

絲綸

恩白

天來等諸生而誌慶感同身受代下悃以陳詞茲據鳳凰乾州永綏保靖四廳縣詳據紳士  
趙地靈等呈請代詳恭

謝前來理合據情詳請

憲台俯賜察核詳

題爲此備由繕冊具申伏乞

照詳施行須至詳者

苗備捐出完納各寨苗人每年應征額糧潘司朱紹會

為苗弁捐田完糧詳請立案冊案奉

憲台批本臬司前在辰沅道任內詳稱嘉慶十二年十二月內具詳鳳凰乾州永綏三

廳額征苗人雜糧請於各該廳苗人呈繳田內餘租項下通融完解毋庸向各苗催征

一案已於十三年十一月內准潘臬司咨奉

撫憲 批准

戶部議駁行令轉飭各廳仍照舊例辦理等因奉

旨依議欽此欽遵行飭在案茲據鳳凰廳同知姚興潔署乾州廳同知陳丹山永綏廳同知

李方毅會詳據苗守備龍八月麻老貴吳永和等二十七名呈稱苗人所納雜糧係

國家正供自應各效輸將弁等渥沐

皇恩授官給餉光榮豢養頂感實深既蒙責令管束散苗自應好為體卹查鳳凰廳額征苗

人雜糧一百五十七石七斗乾州廳額征苗人雜糧五十二石八斗二升永綏廳額征

苗人雜糧七十二石八斗四升為數無多原應向各戶催收究恐日久弊生弁等情願

將自己業田共撥二百八十三畝零議由備等經管佃給誠實苗人耕種歲收租將二

百八十三石完納前項額糧於正賦仍無更張在各苗人益臻康樂伏乞據情轉詳立案等情由各該廳縣會計到道據本職道覆查前項雜糧上年詳奉

撫憲 題請於苗人呈繳田內餘租項下通融完解原以體卹窮苗杜絕弊端嗣奉

部議仍照舊例辦理立論極為嚴正自應恪遵照辦惟現據各苗弁瀝情呈請情願將自己業田共撥二百八十三石三斗六升完納前項額糧情詞懇切實為體卹窮苗起見既非以官租代完糧課而於

國家正供仍屬照案輸將似應俯如所請以順彝情至每年民賦奏銷督催經征考成悉照舊章辦理似可毋庸

題達以省案牘緣據前情理合具文詳請

憲台俯賜察核批示立案等情奉批仰布政司會同按察司核議詳奪仍候

督部堂批示書冊併二仍繳又奉

憲台 督部堂批 批仰南布政司查核通詳仍候

撫部院批示繳各等因奉此本司等查鳳凰廳額徵苗民本色雜糧一百五十七石七斗乾州廳額徵苗民本色雜糧五十二石八斗二升永綏廳額徵苗民本色雜糧七十

二石八斗四升前經詳請

題咨請於苗人呈繳各田內餘租項下通融完解毋庸向各苗催繳奉

部議駁飭仍照舊例辦理本難另議更張惟據該苗弁等瀝情呈請願將自己業田撥去二百八十三畝零募佃耕種歲收租穀二百八十三石三斗六升完納前項額糧情詞懇切係爲體卹窮苗起見既非以官租代完苗課而於

國家正供仍屬照舊輸將應俯如所請辦理以順彝情其每年造報收支細數及民賦奏銷督催經徵分數考成仍悉照舊章辦理俟可毋庸

題達以省案牘緣奉批議是否有當理合具文詳請

憲台俯賜察核批示移遵

撫部院景 批如詳轉移遵照辦理仍候

督部堂批示繳原詳存又奉

督部堂汪 批如詳轉移遵仍候

撫部院批示繳

撥田收租加增各廳縣書院義學經費

布政司朱紹曾  
按察司傅鼎

為加增各廳縣書院田畝詳明立案事案奉

憲台批本臬司前在辰沅道任內詳稱案查嘉慶十二年九月內奉

撫憲  
憲台

奏辦苗疆均屯未盡事宜案內鳳凰乾州永綏三廳及瀘溪麻陽保靖等縣各

設書院一所慎選師儒教廸考取民苗生童肄業以資造就又添設屯苗義學一百館  
令丁勇民苗子弟就近讀書以化氣質其書院束修膏火在於官贖均田鳳凰廳撥給

五百畝永綏廳四百畝乾州瀘溪麻陽保靖四廳各三百畝共需田二千一百畝屯苗  
義學每館稻穀十六石共需田一千六百畝

奏准行飭遵辦在案除各屯義學田租足敷館穀毋庸議增外惟查鳳乾永保四廳縣民

苗諸生仰蒙

撫憲  
憲台 奏請恭沐

聖恩得與鄉薦莫不歡欣鼓舞均思上進現在各廳縣書院肄業較多即麻瀘兩縣士子聞

風興起亦皆敬業樂群所需膏火必須多為籌備足數支給查近年

督飭三廳屯苗各佃陸續新墾田畝現屆成熟今議於鳳凰乾州永綏保靖瀘溪麻陽

各廳縣各添撥田一百畝又苗義學五十館除近邊十五館與各屯無異毋庸增給館穀其餘多在深巢地方寒苦所延館師悉與內地屯館束修一律支送不足以示區別今議於最深之處計五十館每館加增穀八百石次深之處計二十館每館加增穀四石以昭體卹共應添撥田二百畝以上加增穀田同從前原撥之田一體飭交殷實公正紳士及總屯長妥爲經理以增膏火束修仍責成道廳縣隨時稽查年終另案造冊申報

憲台  
撫憲

暨  
藩司

貴司  
查核毋庸同原

### 奏各條一併咨

部以省案牘相應詳請俯賜查核批示立案等情奉批云各等因奉此本司等查鳳凰乾州永綏保靖瀘溪麻陽六廳縣書院近來肄業諸生較多所需膏火自應多爲籌備以敷支給應照議於三廳屯苗各佃陸續新墾田畝內撥給該六廳縣各田一百畝其在深巢地方寒苦之苗義學亦請照議將館穀加增最深之處計五十館每館加增穀八石次深之處計二十館每館加增穀四石共應添撥田二百畝以上加增之田同從前原撥之田一體飭交殷實公正紳士及總屯長妥爲經理以增膏火束修仍責



成道廳縣隨時稽查年終另案造冊資報查核毋庸咨  
部以節案牘緣奉批議相應具文會詳

憲台案閱批示飭遵

嘉慶十四年八月 日奉

撫部院 景批加詳轉移遵照辦理仍候

督部堂批示繳又奉

督部堂 批據詳已悉仍候

撫部院批示繳

添設最深苗寨義館

爲詳明等事嘉慶十四年十一月初九日奉

護撫部院朱 批前司會同本署司前在臬司任內詳稱本司等會查得苗地通計共

設五十館有相距較遠或數十里或百餘里負笈往返頗勞跋涉須於深巢苗館較稀

之處添設二十館俾得就近從師以廣訓迪歲增修脯尙屬無多應請俯如所稟辦理

以資造就但此項義館應設於何處歲需膏火若干及於何項銀內支給未經聲明應

署布政使司 傅 鼎

請飭令辰沅道另行妥議籌酌詳覆移咨核辦又查苗民貿易定例在沿邊開設集場按期赴趁乃有深巢苗人憚於遠涉遂在岩內私行開場交易則場一設卽啟奸民借趕場爲名混入苗地難以稽查實所關匪細不可不預爲防範封閉亦應請俯如所稟飭令取具苗官切結不准再開並飭各地方官隨時查禁以杜後患緣奉批議是否允協理合會議詳請

憲台查閱批示以便移咨辰沅道遵照辦理爲此 云云 奉批如詳轉移遵照辦理仍將增設義館應設於何地歲需膏火若干及於何項銀內支給之處移道妥議由司另詳核辦併候

督部堂批示此覆又奉

督部堂汪 批仰候

撫部院批示移遵繳

覆詳

本司等會查得乾州廳增設苗義學二館鳳凰廳八館永綏廳七館保靖縣二館查係俱在深巢地方寨苦所延館師若與內地屯館束修一律支送不足以示區別應請照

十四年原詳深巢苗學於原定穀十六石外加增穀八石每館歲給穀二十四石又古丈坪增設一館並非深巢每歲給穀十六石以示區別至此項穀石每年計算共需穀四百七十二石既准該署道查明通盤籌畫別無餘款每年請於經費租將項下撙節動用餘出穀四百餘石支給館師作爲膏火尙屬妥協應請俯如所請每年卽在經費租將項下支給仍照依十四年加增最深次深苗義學穀石之案年終造冊資司詳銷毋庸咨部以省案牘是否允協相應具文會詳

憲台察閱批示移飭遵照爲此

云云奉

撫部院景 批如詳移飭遵照仍候

督部堂批示繳又奉

兼署督部堂張 批仰候 撫部院示繳

撥田收租給苗疆生童試資

爲撥田籌辦苗疆生童試資詳明立案事案奉

布政使司 朱紹曾

憲台批據辰沅道詳稱竊照苗疆各廳縣士子自遭苗變蕩析離居復業後綢繆桑土棄置丹鉛雖向上有心而讀書無力是以每屆開考之期應試之人較少自嘉慶十二

年八月內蒙

憲台 奏准各廳縣增設書院六所屯苗義學一百館撥田三千七百畝作館師往來備膏火之需續蒙

憲台 奏准鳳乾永保四廳縣民苗士子鄉試另編字號取中兩載以來該廳縣生童觀感興起頗知刻勵漸能文循法脈辭選華腴卽各寨苗生童亦知循名責實矢志編摩感化之心蒸蒸日上凡遇鄉試歲科小試自應酌量調劑俾得遂其上進之心近年該生童凡鄉院各試盤費均經職道隨時籌給恐難爲繼茲於鳳乾永三廳屯苗各佃新墾田內撥出田一千畝按畝收租變價作民苗生童考試盤費惟該廳縣應試之人日久漸多勢難遍及必須酌定限制庶足敷支給今議將鳳乾永麻瀘保六廳縣生童之錄取書院正課者又鳳乾永保四廳縣生員內科取正案者又四廳縣歲科試童生考列前十名者又鳳乾永瀘麻五廳縣均田歸公百畝以上之本身及子孫並原

奏鳳乾永瀘麻五廳縣首先出力紳士之子孫以上該生鄉試各給盤費銀十兩該童赴府廳縣考試各給盤費一兩院試各給盤費銀四兩其有一人而兼二三四等者止准一分不得藉詞重領至苗童則無論是否前列十名凡赴縣廳府院試者各給盤費銀

十兩報道查核如是年並非鄉試及歲科兩小試上年並考已畢無須發給盤費即將銀兩存貯道庫留於下年支發如此辦理則生童之貧乏者既不慮試費之艱其考取前茅及急公好義之人皆有鼓勵猶必奮志青雲而邊彝諸生得遂觀光益臻向化於培養苗疆寒畯振起文風之道似有裨益除將田畝坵段另造細冊申報外所有苗疆各廳縣生童應試盤費撥田籌辦緣由理合具文詳請察核批示立案等情奉批云云等因奉此司道查苗疆各廳縣民苗士子應試盤費維艱自應酌量調劑俾得遂其上進之心應請照議於鳳乾永三廳屯苗各佃新墾田內撥出田一千畝按畝收租變價作爲民苗生童考試盤費將鳳乾永瀘麻保六廳縣生童之錄取書院正課者又鳳乾永保四廳縣生員內科考錄取正案者又四廳縣歲科試童生考列前十名者又鳳乾永瀘麻五廳縣均田歸公百畝以上之本身及子孫並原奏內鳳乾永瀘麻五廳縣首先出力紳士之子孫以上諸生鄉試各給盤費銀十兩諸童赴府廳縣考試各給盤費銀一兩院試各給盤費銀四兩其有一人而兼二三四等者止准給一分不得藉詞重領至苗童則無論是否前列十名凡赴縣廳府院試者各給盤費銀一兩苗生則無論科考之正案錄取與否凡赴鄉試者各給盤費銀十兩由道查核如是年並無鄉試及

歲科兩小試上年併考已畢無須發給盤費即將銀兩存貯道庫留於下年支發俾貧乏生童試費有資其考取前茅及急公好義之人皆有鼓勵仍令將田畝丘段造冊申送並於年終將收支存剩數目造冊送查以歸核實緣奉批議理合會核具文詳覆  
憲台察閱批示遵飭

嘉慶十四年八月 日奉

撫部院景 批如詳轉移飭遵辦理仍候

督部堂批示繳原詳存又奉

督部堂汪 批據詳已悉仍候

撫部院批示繳

撥田收租爲各廟歲修時祭之用

藩司朱紹曾  
臬司傅鼎

爲捐撥各廟田畝詳明立案事案奉

憲台批本臬司前在辰沅道任內詳稱竊照文武官駐守地方禦災捍患惟藉神庥而崇德報功聿明煙祀鳳乾永三廳自乾隆六十年苗變後各廟多被燬壞職道前於鳳凰廳總理邊務及辰沅道各任內歷年在三廳地方查明原設及應行增添各廟陸續籌款修造年來民苗綏輯雨暘應時何莫非神靈默佑使一任風雨之漂搖致垣墉之傾圯憑依無自貽守土之羞至從前苗匪滋事時有紳士丁勇或衝鋒陷陣効命疆場或守義捐軀全家被害此等大節昭然既設位立祠歲時致祭猶當煥其廟貌以勸忠義茲職道於捐贖苗當民田苗均撥歸鳳凰廳各神廟一百五十畝乾州廳各神廟五千畝永綏廳各神廟一百畝又撥歸鳳凰廳義勇祠一百畝鳳乾永三廳義烈祠各五十畝以中年核計每年可收租穀一石爲各祠廟祭祀修葺之需仍責成各該廳督同總屯長妥爲經理年終報道查核如此捐置田畝庶各祠廟足垂久遠未核祭三處亦享祀有資除將田畝坵段租額容另冊報外理合將捐置田畝緣由具文詳請察核批示立案等情奉批云云等因奉此本司等查鳳乾永三廳各廟宇因乾隆六十

年苗變後多被燬壞嗣經籌款修建又從前苗匪滋事時有紳士丁勇等或効命疆場或守義捐軀全家被害俱經立祠致祭所有各祠廟祭祀及修葺之需俱不少應如議請於捐贖苗當民田均撥歸鳳凰廳各神廟一百五十畝乾州廳各神廟五十畝永綏廳各神廟一百畝又撥歸鳳凰廳義勇祠一百畝鳳乾永三廳義烈祠各五十畝以中年核計每年可歲收穀一石爲各祠廟祭祀修葺之需仍責成各該廳督同總屯長妥爲經理於每年年底將收支所存剩數目造冊通查核除移道將田畝坵段租額造冊另報外緣奉批議理合具文詳請

憲台察閱批示移遵

嘉慶十四年八月 日奉

撫部院景 批如詳轉移遵照辦理仍候

督部堂批示繳原詳存又稟

督部堂汪 批如詳移遵仍候

撫部院批示繳



撥給苗疆教職學田

爲捐學田詳明立案事案奉

布政使司朱紹曾  
按察使司傅鼎

憲台批據南臬司前在辰沅道任內詳稱竊照地方設立廣文實爲政教之本然必充其日用庶足以敦品學而化士林查鳳凰乾州永綏保靖四廳縣各設訓導一員地處邊隅官居冷署既未能席豐履厚室有倉箱又非若大邑名州門盈桃李該廳縣歲科兩試取進學額鳳凰民生六名苗生二名乾州永綏民生四名苗生二名保靖八名前以積習相沿該教職等於歲科試畢收受新進諸生贄敬陋規自遭苗變後各民戶又均田養勇俱非裕饒之家而各寨苗人甫經向化讀書猶應倍加體卹業經職道照例嚴飭革除不許再行收受惟該教職等首蓓寒毡缺分清苦歲支薄俸實不足以贍養身家查三廳各學從前雖皆撥有學田數畝俱係坐落深巢先爲苗佔清釐之後已歸入苗繳佔田項下今職道於捐贖苗當民田內分撥鳳乾永保四廳縣儒學田各一百畝歲收租穀以中年核計可得一百石合所支廉俸足敷薪水之需庶該教職等饗殫有資簞簋自飭既可安心教導復可取立範矩足以仰副

憲台整飭官常並體卹窮員之至意所有捐撥學田緣由理合具文詳請查核批示立

案等情奉批云本司等查鳳凰乾州永綏保靖四廳縣各設訓導一員歲支薄俸  
不足以贍養身家應請照議於捐贖苗當民田內分撥鳳乾永保四廳縣儒學田各一  
百畝歲收租穀以中年核計可得一百石合所支廉俸足敷薪水之需以示體卹除移  
道將撥田畝坵段造冊查報外緣奉批議理合會詳呈請  
憲台察閱批示飭遵

嘉慶 十四年八月 日奉

撫部院景 批如詳轉移遵照辦理仍候

督部堂批示繳原詳存又

督部堂汪 批如詳移遵仍候

撫部院批示繳

苗疆教職毋許向新進士員勒索規禮

湖南辰永沅靖兵備道傅 為札飭事照得鳳乾永保各廳縣地方前遭兵燹蕩析離居還定勞來甫聞弦誦方期體卹培養士氣振興本道於嘉慶十年由鳳凰升任以來訪聞苗疆教職每逢歲科兩試取進文武民苗生員於謁見填冊時恣意索取名為印卷禮各寒峻一經入泮即受窘迫無論貧乏之家力難致送即從前有力各戶自遭苗變後復又均田養勇亦非饒裕之家何堪受此需索而各寨苗人甫經向化讀書猶應如意體卹查例載教職勒索贖見規禮革職

功令綦嚴是以本道體恤該員於額支俸廉之外每員在官贖田餘租項下歲給穀一百六十

石統計三年給支三百八十石不得於歲科兩試再向新進文武民苗生員需索印卷規

費現值考試之期誠恐狃於積習合行札飭為此札仰該教職遵照務須恪守

功令毋稍需索倘不知鑒足仍蹈前轍本道一有見聞定即據實揭叅決不姑寬切切此札

議單

立議單 鳳凰廳 乾州

永綏廳 保靖縣

總屯長

某

等今議得楚俗歲科兩試入泮者各備銀兩於

招覆前謁見 學師名曰印卷禮卽弟子謁師贊敬於例本有不符但相沿已久各處  
皆然茲由鳳凰永綏乾州保靖四廳縣地方自乾隆乙卯苗變後蕩析離居士鮮弦誦  
蒙

傅恩憲勞來還定安集哀鴻又於武功既備之餘興修文教詳請大憲 奏准鳳乾永  
保瀘麻六廳縣各增設書院一所屯苗義學一百館又 奏蒙

大恩每科鄉試鳳乾永保民苗諸生另編邊田字號取中二名

憲德汪洋已無微不至茲又稟請凡飭以

鳳乾永保各學師每年已給穀一百石以助薪水如遇考試不許向新進民苗文武生  
員收取印卷規費極爲嚴切但念

學師寒毡苜蓿缺本清苦且諸生旣列門墻應修弟子之禮以昭誠敬是以公同酌議  
凡歲科入泮者由各學廩保秉公查明有力者出贖儀銀十二兩稍有力者出銀八兩  
無力者出銀四兩倘實係赤貧未能措備卽由總屯長籌款代無力之生致送庶  
學師得有攸助於送考盤費等不致支絀是於遵奉

功令之中稍盡師生之誼立此議單爲據

屯田耕守猶其迹也大兵之後荒蕪居多兵既退降寇則居之是終聚亂也客乘其間盤博其人以爲之私利雖有官長豈能日察居富而驕飽食而人衆則作亂土塘數萬客兵數千撤則土塘歸於寇留則客兵逸而遊且標營既衆官弁既繁不田而食待運而饟一旦變生皆不可測秦始皇有天下鋤諸侯世家之根據而郡守縣令爲游食天下雖亂於秦而治於漢唐宋元明之世不可謂非立制之善也然則開屯防邊其無可議矣乎而世猶有非之者則私心揣度之私與辦事者之過也而豈創法之罪焉

四... 五... 六... 七... 八... 九... 十... 十一... 十二... 十三... 十四... 十五... 十六... 十七... 十八... 十九... 二十... 二十一... 二十二... 二十三... 二十四... 二十五... 二十六... 二十七... 二十八... 二十九... 三十... 三十一... 三十二... 三十三... 三十四... 三十五... 三十六... 三十七... 三十八... 三十九... 四十... 四十一... 四十二... 四十三... 四十四... 四十五... 四十六... 四十七... 四十八... 四十九... 五十... 五十一... 五十二... 五十三... 五十四... 五十五... 五十六... 五十七... 五十八... 五十九... 六十... 六十一... 六十二... 六十三... 六十四... 六十五... 六十六... 六十七... 六十八... 六十九... 七十... 七十一... 七十二... 七十三... 七十四... 七十五... 七十六... 七十七... 七十八... 七十九... 八十... 八十一... 八十二... 八十三... 八十四... 八十五... 八十六... 八十七... 八十八... 八十九... 九十... 九十一... 九十二... 九十三... 九十四... 九十五... 九十六... 九十七... 九十八... 九十九... 一百...

永綏廳志卷之三十

叢談凡例 九條

直隸開州董鴻勳湘帥修撰

一此卷原文本稱自爲一卷乃刊板時仍併於第六卷今爲別之

一此卷原文列六卷之末今以次爲第三十卷而其詞不易焉

一古之爲書者多於卷末有自序一篇撰述家世叙錄生平與所以著成此書之緣起之本來由使讀者精神一聚足堪取法今乃錄五十初度自序以代之以其書適成於其時家世之述則已見於前作古陽之志並行於世茲不再述而以著此書之本來則可見矣

一原文分四十目敬依其舊其少有增入之目皆因附其說故不必特立門目尙有典型故其可法

一原文簡要多無文飾然一唱三歎有遺音者是尙指人聲樂歌之使人毋忘其生若皇極之敷言是訓是行輻軒探里巷之詞以登太史之籍軍賓鄉祭皆惟詩歌故今於四十目仿史漢之列一一繫之以辭使讀者味美於回而此書雖繁醴醴乎其有餘思也一鴻勳之意在明堯舜湯文孔子之道以佐我





永綏廳志卷之三十

叢談目錄

二十三則

花園賦

摩崖銘

擬苗疆納土歸流謝表

撫苗碑

舊城十景詩

新城十景詩

和楊二雍度盧峰書院四首兼東陶適齋明府

壬午新秋永綏署齋和顧雙溪見寄原韻

永綏廳署海棠詩

有序

永綏湖水溪觀潮

書彭雲司馬永綏死事

秦關

龔立海

陳長鎮

鄂海

段汝霖

黃本驥

徐廷棟

劉豹

周鐸

弔楊烈婦七古一章

楊瑞珍

弔楊烈婦五律二首

劉禮章

弔楊烈婦五律一首

鐘應先

弔楊烈婦七律四首

宋世熾

郭孝女剪舌醫母歌

楊瑞珍

弔熊舜俞鎮軍殉難丹陽

丁紹周

將發永綏就試長沙寄潘竹軒文

胡啟文

弔王品一間戎粵東殉難六首僅錄其二

王先春

詩六首

董鴻勳

高等小學堂記

李見荃

跋

謝光楚

五十初度自序

董鴻勳

全志四十目序

自跋 自評

永綏廳志卷之三十藝文門二

叢談

自天文以下凡有關廳境者既分類各著矣其中有關於廳境而未能附諸各門者另輯一卷爲叢談

五溪所祀白帝天王三神面白紅黑各異報賽甚豐苗民畏之各書載神姓名蹟事不同辰州志謂神係漢田疆之三子分居中城上城下城自保以拒王莽者然今神像只三人果爲疆子則三子之忠義皆秉其父命不應舍父而祀其子且東漢建武中武陵蠻不靖朝廷屢用兵伏波將軍進征至壺頭疆既以漢臣自矢不應史傳中無田姓子弟從役伏波者則未可據也瀘溪各誌述史記西南夷傳剖竹中得小兒長爲夜郎侯漢武誘殺之子三人皆蠻夷所推而第三子尤雄勇後人以竹王非血氣所生有神靈爲立廟以祀今廟中神狀三郎猶猛烈爲苗所畏當卽此也但夜郎地在楚蜀之間爲今施南一帶去五溪尙遠又蠻民所虔者竹王亦不宜舍竹王不祀惟舊志中言辰州人楊名瀨者兄弟三人皆爲宋驍將當苗出沒爲害領衆擊之知苗貪飲食多宰牛豕烹之懸林間苗爭相食啖出不意大破之遂開九溪十八洞僅留吳石龍麻廖五姓殘苗後反命人忌其功遺以

醜酒同時俱殞乃小暑節也今此節爲苗中所最重且楊墓在黔陽托口似實有所據而頗以他書楊產靖州墓在黔陽爲疑不知沅靖二州宋時皆南江地本羈縻於辰州且如辰州志所言則忠在拒莽而於蠻無功如史記所傳則持蠻中祖先槃瓠廩君之屬亦不必蠻畏如此獨所傳楊氏兄弟者能捍大患而以死勤事生爲蠻民所攝服宜其設而蠻猶懼之也文獻無徵姑存此數說以備察考

乾隆乙卯逆苗攻城危急時里民楊洪妻某氏詣天王廟虔禱曰神素著靈異苗人攝服今凶逆若此何不殛之氏歸神忽附其身自稱天王下降教衆以禦賊之方衆未之信而賊至氏輒先知之卽揭裙爲旗衣蟒衣率其儕登城巡守賊鎗矢不能中衆始神之一日氏告官兵曰明日賊傾巢來犯將用三角礮似呂公車攻城城必難保我兵宜先詐降將城中火藥運出送賊彼將深信不疑俟誘集城下我兵先備火彈千餘出其不意一齊急拋放之賊必大厄城可無恙也翼日登城而望賊果蜂擁張傾巢大至軍民乃悉如其計以待之賊衆焦頭爛額不可勝數各鳥獸散方賊盛時城中夜見白氣一團盤旋空際居民惶懼氏曰賊中有白蓮教此其妖氛也使衆擲以不潔物而自以犬血塗箭鏃弓射之氣遂滅俯視地上有血點自後賊勢漸解散未幾大兵雲集剿撫兼施全境蕩平後宜昌

鎮張總兵新建花園三侯廟碑中記其事雖跡涉荒誕而

盛世百靈効順於危急時顯靈異以全一城事或有之

韓昌黎有言微兵盈萬不如召募三千此言鄉勇之利也自護梓里則人有固志習其山川水土則登涉便捷而疾疫不生軍興以來堵禦剿捕鄉勇之力爲多然易聚難散當預籌散遣之方安置之地耳詩曰矯矯虎臣又曰闕如哮虎貴州提督花連布驍勇異常赴援永綏所至苗畏辟之號曰花老虎而湖廣特督劉君輔守禦鎮筸及轉鬪隆團花園間皆身先士卒戰甚力軍中因其髯黑亦有黑老虎之稱後漢書西南夷傳言槃瓠負高辛氏女逃入武山石室生六子六女自相配偶是爲羣蠻之祖魏畧言高辛氏有老婦居王室得耳疾挑之乃得物大如繭婦盛之瓠中覆之以槃俄頃化爲犬其文五色因名槃瓠于寶晉紀言武陵盧江郡夷蠻槃瓠之後雜處五溪之內憑山阻險每常爲害糝雜魚肉叩槽而號以祭槃瓠俗稱赤髀橫犇乃其子孫夫以釐降之典下及犬羊事固荒誕不經而天地之大何所不有今苗俗百物皆食羅雀捕蛇以爲珍味而獨禁食狗肉則槃瓠之說似非無因又陳士元江漢叢談槃瓠人名非犬名易之復十一月之卦也象爲雷伏地中鳴則非宜父老以鳴日所值支干占之往往有

驗如甲寅乙卯爲饑饉丙丁己午爲旱庚辛申酉爲兵戈之類方位亦以此斷甲寅年冬月庚申日雷鳴占者謂西南邊地恐有事至次年正月而苗變天心仁愛預示以象不可不先事知防矣

邊老言歲值甲寅乙卯南方輒有事康熙十三年甲寅吳逆叛於滇次年彌熾雍正十三年黔中台拱苗亂乾隆六十年三廳苗復不靖皆乙卯也又謂苗地甯謐無過六十年竊嘗思其故苗民滋息極易至六七十年滋息已三世食指繁多莠良不齊苗地瘠薄不能生活必浸淫而成事變須大加芟除始得相安無事此非有他占驗亦就人事論之耳

田綸霞先生巡撫貴州時以苗人屢出盜邊設鵬剿法黔苗至今畏之鵬盤飛空中遇逸禽伏雀一掠而至一擊而去其視甚審其來甚捷往往無能脫者倣此法以剿苗先揀敢戰大弁數員練精兵二三千募健土人數百爲軍目分段巡徼遇有滋事之苗查探的確備乾糧躡路徑出不意剿之或晝伏夜行或聲東擊西風馳電掣徑搗其巢燬其廬舍旋即撤回總之兵不留行令其惴惴然聞鎗炮而落胆疑草木之皆兵而於安分良苗秋毫無犯其中偵探之術虛噶之方則參用沈總兵希儀各法狡苗狐兔伎倆

自無所肆奸矣

苗人打仗時火銃最難提防嘗編毛竹及生牛皮爲盾又粗笨難運不便登跋山谷澗溪張尙林所募六堡鄉勇皆穿厚棉絮衣臨戰用水潑濕雖未必遽足遮蔽而銃子爲絮包裹且濕則無力其傷人亦不重故六堡鄉勇極稱勇敢而尙林每戰輒有功云一法用婦人服頭雜棉絮作甲其油氣亦能裹銃但此物不能多得數歷行間之將官則有不可不預備者

勾補未滋事之初有販牛客驅牛過其地苗竊去客訟之官令百戶暨辦苗外委查緝百戶等藉以索詐財物勾補苗民戶皆受累忿曰我旣失錢須得錢賠點者遂糾衆伏道攫人石滿宜握土中得大石龕狀似龍頭以爲當作苗王乘寨苗之怨遂生叛謀雖當經撲滅而乙卯之亂已胚胎於此往時百戶與辦苗外委多外間奸高承當遇苗戶事件敲骨吸髓無所不至甚至一苗在案閩寨被害故滋事時百戶無一生者善後事宜深知其弊革去之苗稱便焉

生苗處密林深谷距各邊口百里數十里不等裹糧而行非一二日不達所過之寨或係冤家猶必遶道辟之及進口攘竊所得近邊各寨恆截路坐分其獲財無多故生苗

之盜邊絕少凡生苗滋事必沿邊熟苗爲之勾結否則係熟苗作奸而假託於生苗生苗雖悍尙愚直無他腸熟苗則狡詐百端馭苗之法能使沿邊熟苗知所懷畏即可帖然無事亦苗情之當知者也

苗中設立義學俾苗童漸通交教知禮義極爲化苗良法然舊例義學館師必取廳學中文理明白之生員承充既係生員自然尙知講解久而利寶環生鑽營者衆巫師道人亦以賄進生員挂名冊中而實充者則非生員以此輩爲師長無論不知教化而藉以漁利其不致偕百戶人等勾結生事者鮮矣異時漸復苗學不可不於館師安定章程也

苗中有楊老令公祠不詳何許人令公似唐五代尊官之稱相沿至今也居民報賽甚虔松永閒有神祠頗修整苗滋事時古刹叢祠多被焚燬此廟歸然獨存詢之則曰苗縱火數次不能燃持炬人手反焦灼或歸而發狂自批其頰後因不敢輕犯

聖天子精誠浹洽百神効命神雖事蹟莫詳亦必有功德此間故能著其威靈血食不衰

云 按楊靖州之楊飛山廟是也詳靖州志

乾隆二十九年巡撫陳宏謀等



奏許民苗結婚當其時急於化苗以民苗婚姻洽比可使氣類相感自當聞風慕義仍著令凡結婚者必設立婚書報官以便稽查於弛禁之中寓防維之意久而娶苗婦者曰衆官不勝其繁報官之令不行地方棍徒勾結痞苗販賣苗婦女射利沿邊廳邑幾於村皆有苗婦其父母兄弟往來探視與內地姻婭無異或傭工親貫家中徑路無不諳熟一旦變生呼吸村落徧受其害苗婦雖在外數十年無不從其家人歸者傳曰非我族類其心必異新奉

### 功令禁絕嚴立防制實安邊之大計

二卒者遺其名逆苗滋事時永綏深在苗巢聲息不通外間疑永綏已陷失姑從緩經畧永綏求救之十餘輩俱爲仗道苗所殺最後有二卒改苗裝晝伏夜行至大營號哭大將軍帳外將軍召見之泣請曰永綏被圍兩月餘矣女子乘陴以守析屋作薪爇糠作粥亡在旦夕將軍急援之則永綏爲朝廷有不急救則永綏官弁士民惟有盡忠爲朝廷死耳遂嗚咽不能言將軍慰勞之賞以食不食將軍感其誠乃檄楚中當道約共進兵援永綏永綏得不陷後二人無所聞豈其已前死遂遺其姓名耶然其慷慨激烈之氣視南霽雲之乞師賀蘭無以加矣

明分守道蔡復一撫治苗疆議言苗疆之患頗爲詳盡然亦有宜參用者治苗之道當清其源設哨立營雖極綢繆祇是第二義分各苗寨做黔省規制設土官制土兵俾世守其地因苗俗以治漸用漢法箝制之化導之土官思爲子孫之計自當輯甯部衆清源之一說也無已則用羈縻之術沿邊滋事之數十寨未必戶盡凶悍寨中有山場田土可以存活者亦自能安本分凡出外擾竊多係無業窮苗猶民間恒產全無者始爲不聊之行也此類在寨中人數亦不甚多通計數十寨亦不過數百人千人酌用苗糧若干分統以苗弁守各要卡仍做營制爲建兵房令其携眷居住此輩既有家口在外自不敢輕生反側責以稽防可漸收以苗治苗之用卽不能得其實力而令此無業窮苗有以安身不致勾結滋事其裨益亦不少則斟酌行之亦駕馭之一方也苗官苗兵之設由於此

馭苗之難不難於一戰而勝之難於舉種而安之出奇決策使之震讐兵威此一戰之功也然兵力雖雄盛谿洞阻深其種類不能盡殲而兵無不撤糧無不停之理苗情狡詐當進剿時搬入高界深籌追捕無踪及進剿之師既退又復潛回故地負弩伏機窺伺進村我退則來我來則往奔命徒疲無如彼何伊何道而使之帖然無事哉經曰柔

人也傳曰懷輯百蠻竊嘗思柔字懷字之義必有盡撫摩之方而消其桀驁之氣絕猜忌之隱而生其感服之情者如弄猛獸久之自馴如飼野禽久而相親故夫整勵兵威寇至則戰邊將之事至於推誠布公駕馭有方俾之性情相洽漸被於聲教是必賴於賢司牧也有非一朝夕之故者

馭苗之方當震勵兵威之後必撫綏與防範並用昔人有言宋人專務撫綏錫爵加賞不足以壓其欲明世專事防範築牆設哨不能以遏其鋒蓋專事防範而不務撫綏苗情既未帖然詎能相安無事千餘里要隘兵力何能遍防徒事撫綏而不言防範則我無制敵之術禦寇之具彼方玩我於股掌之上而思何能結故撫綏者所以盡彼之情而防範者所以固我之圉夫撫綏非第在賞賜已也有限金帛難填谿壑繼之則糜費不貲不繼則不獨前恩盡棄而且適足以府怨亦非專事文告已也苗人鮮識字深樓巖谷之中雖有文告彼固未嘗聞之官不能爲之耳提面命則連篇累牘特虛文耳所謂撫綏云者其道固在聚所欲而去所惡也舊志段汝霖之言曰苗人所欲惟利日用所需有鹽錢布疋絨線絲麻等物官爲之設集場通商旅以貿遷有無苗人經歲所獲藥材山貨芝蔴雜糧有所出易不致壅滯不行則利得矣而需用諸物又得隨便買用

不致有錢無市則羣情自然悅暢其所惡則在凶惡之苗亦猶民間之有棍徒此等凶惡苗憑鄰凶勢動則穴鬪擊人強梁橫暴在一方則一方爲之不甯在一寨則一寨均受其害良苗莫不側目飲恨而被彼挾脅或從爲不法詎屬本心如此凶苗廉訪既確雕禽重懲以快衆心寬其脅從以示恩澤則苗人無不畏威懷德此言於撫綏之術可謂得其要領矣至於防範之要不過嚴營汛築堡壘設團練防奸細數大端要在行之不倦慎於前不懈於後無令積久玩生此治法之猶賴治人也 明宣德間蕭總兵授築堡二十四座嘉靖間張總督岳加修十三營哨哨必有土垣繚之亦堡之意也自來設邊防莫不以堡爲急以其可限戎馬之衝突而爲居民扞蔽也於苗疆中猶爲要緊竊嘗論之苗人所恃者鳥銃施放可至數十步外而不能擊洞重垣土堡之固或用毛石砌成卽薄者亦必築土二三尺可以遮蔽鳥銃一利也苗人驚駭閭左在乘夜放火就僻邨茅屋縱一炬而數里內居民紛紛逃竄旣築土堡則房屋皆在堡內無能縱火二利也百姓四散住居未免形勢單弱難以守望相助有堡以聚之則多者數百家少者亦有數十家比廬而居聚族而處聲勢自然雄壯三利也且散地難於守禦獫狁猿徑處處可以踰越有堡可憑則荷戈登陴以數十百人分布一堡之間人數敷用自然

嚴密四利也至民間所收糧食貯積堡中一應牛豕牲畜俱欄養於內則尋常鼠竊亦不致輕有窺伺五利也夫數里之間前後左右各有壑堡一堡有警各堡互應或邀截或夾攻既有輔車之勢自有犄角之功六利也凡築堡者飭於堡旁取土之處卽便挖成深濠則堡成而濠已具濠中令截其密栽棘刺及叢竹之類一二年後棘刺叢生是生成鹿角蒺藜七利也嘉慶中永綏設營屯汛堡四十餘座居民安帖近六十年日久漸有坍塌急宜隨時修治庶幾有備無患足資捍衛焉

禦苗之方不止一端猶莫便於設立練總力行團練其法日則互相巡邏夜則於一村一寨之中輪流派撥伏路守卡一戶有警各戶救護一團有警各團應援仍於農隙時仿照沿海之例委佐雜等員赴彼操演或廳州縣官因公下鄉之便間一查點親爲試驗鼓舞振興以作其氣俾鄉里之間互相聯絡首尾相應如常山之蛇廳州縣官調度於上練總督率於下誠安邊善策也蓋近苗之處苗路如織而苗疆遼濶苗多兵少不得不藉資民寨以爲聲援故團練百姓卽屬周官比逐追偕及前代府屯鄉兵之制且設兵固以衛民而兵之愛民不若之自愛其身也不若民之自願其父母妻子也不若民之自護其姻婭黨族也不若民之自衛其盧舍貲蓄也邊徼之間變生呼吸兵非奉

調不敢輕離汎守團練之法行則望衡瞻宇皆成勁旅鳴鑼一號摩劍擁盾之士千百成羣扼要守險以待官兵極爲便當惟是愚民之情人自爲謀非夙有統屬則有事固易號召而不知紀律之衆稍一失利無不紛紛潰散則講團練之法猶必在練總之得人矣

撫綏苗衆爲之遂欲除害固爲拔本塞源之論而痞苗不安本分間出攘竊非痛加懲創則盜邊者有利無害良苗久且效尤故駕馭之方必恩威並用臬司傅鼎總理邊務時募鄉勇數百人親自訓練爬山伏籌多精銳可用而賞罰嚴明能得人死力四路設有探丁偵痞苗進邊輒帶鄉勇分途馳捕身先士卒前後捕斬滋事苗甚多苗極畏之相度要隘安堡設卡早作夜爲無日不以禦苗安民爲事其精神心思實有著在邊徼者練勇之設始此

苗賑詳前風俗門往時苗中尙有客賑營賑二端其害一大營賑爲汎兵所放客賑多衡寶江右客民住市場者放之制錢八百爲一挂月加息錢五至三月不完輒歸息作本計周歲息凡四轉息過本數倍矣約苞穀雜糧熟時折取息錢或乘其空乏催討將田地折算又有放新穀放貨穀諸名放新穀則當青黃不接之時計貨錢若干秋收還

穀若干貨穀則除以布鹽什物計貨若干秋收還穀若干借者必先浼富苗作保貧不能償保人代賠故苗中有債必完往往收穫甫畢蓋無餘粒此債未清又欠彼債盤剝既久山地罄盡奸苗石柳鄧等聲言驅逐客民奪還田地而羣寨響應善後事宜將田地仍分歸苗管嚴禁漢民不許往來苗地防微杜漸自可永絕弊端

舊志段汝霖有言各汎兵丁原欲其彈壓巡防勢不可與苗人親洽致無威可畏漏洩機宜凡遇已娶苗婦之兵請爲查明將該兵夫婦調赴相隔五六十里之汎毋使即在附近本汎以免勾結又苗人錢債轉盼子倍如母若聽弁兵借貸苗寨釁算既多無力清償在苗人不甘輕棄必滋事端

前段言苗借營債此就兵之借苗債者言

再兵苗縱非結親而苗人子女

寄拜兵丁爲乾爺等名色苗寨婦女不嫻閨訓久之情意愈密非勾結爲奸卽妬怨起釁俱宜切實嚴禁此數條於防制邊汎兵弁可云極切流弊

貴州總督張廣泗平定廣西義甯及湖南城步綏甯會同各苗清出叛產設堡田堡卒分營於巡檢典史總之以理徭同知蓋仿屯田之遺制也沿邊如鳳凰之都用盧塘清溪哨高風營靖疆營舊司坪篁子坪全勝營永安哨盛華哨乾州之紫金坪大坪強虎哨鎮溪所灣溪馬勁拗永綏之隆團花園董維大排吾已東坪豐和場之屬雖冲壠

不大而泥脚深厚土極膏沃且水深泉旺易於浸灌稻田計畝收穀贏內地一倍故當未滋事之先三廳米穀甚賤他食物俱爲便益客民寄寓其間稱樂土焉如就諸地開屯練卒參用各邊營田之法數年後屯卒精練人自爲戰可省養兵糜費矣惟是苗人去來飄忽往往於春耕秋割之時出擾非大加懲創分屯重兵爲之防維則屯不易成此又經畫者所當審度機宜焉屯丁之設由於此

方志開卷無不有八景十景者積習相沿無關體要故不載正志然點綴風景胡可少也用特附錄於此按舊城十景一曰梅井泉甘二曰荷池香沃三曰西山曉霧四曰東閣晚鐘五曰聖水來潮六曰靈崑瀑布七曰排樓映日八曰文筆凌雲九曰五指排空十曰三台拱秀新城亦有十景一曰汎濫春流二曰溪橋新霽三曰灘聲應雨四曰古洞藏雲五曰南澗烹茶六曰夕池罷釣七曰白泉沃雪八曰飛沫濺珠九曰山閣朝暉十曰江樓夜月 以上原文

鴻勳讀而註之曰叢談皆極有關係之作於屯防土弁土兵營債客債婚姻均聖歸公各事皆言之詳切引而發之得其原本吾於此深服其經濟之宏詞皆清健卓然古人吾於此深服其文章之美仰俯滋媿已



擬苗疆納土歸流謝表

陳長鎮

伏以澤湧江源翼軫靜天狼之氣威臨月窟保郭恢地犬之牙提北斗以酌陽春熱版  
寒門依雉尾鼓南風而拂區夏榆河桂海列魚鱗龍韜獨運乎九重塹鐵橋而作鎮虎  
竹遙分於照水枕銅柱以爲鄰捷奏西曹歡騰南甸臣等誠惶誠恐稽首頓首上言竊  
惟先王守在四隅不侈拓地開邊之略聖主光函九有必昭同疆共井之風蓋一統之  
車書庸殊中外而八家之吠畝豈異要荒惟西北徧獫狁之鄉而東南半獠獠之域竹  
浮三節爰生遯水鯨鯢木化九隆實產牢山狐兔廖仲力除虎孽廓板楯以開基高辛  
績紀犬戎竅岩巒而孕氣或居松外或據黔中牛角貽孫家習兇殘之性馬郎跳月人  
忘禮義之行鬼鼓迎神賓尉殺老買水唱齋之異俗穿胸跛踵之殊形等身而鑄金刀  
鄭駟奔狻其若電燒石而成跌蹠履荆蹈茨以如爰粵自開闢以來遂爾屈盤爲患殃  
徒跳踵不聞諭祖納課之經郎火縱橫屢煩命將徵師之討頃襄略地莊蹻伏節安歸  
建武征南劉尙全軍不返馬援專旌武水空歌毒霧烝鳶唐蒙通道且蘭莫解炎氛礫  
石三年疲衆霜清定笮之魂五月興師風慘漚澹之魄程苞漫領赦詔制製黃麻高駢  
浪結和親玉埋青冢從此夜郎自大因而都貝稱尊黎母摩天陽鳥駐輦點蒼插漢陰

鬼回鑿謂半灣水足抵三千恃一天岩可當十萬精夫星列竊據版章塞主其分私征  
徭稅雖有羈縻之郡不載王會之圖從古如斯於今爲烈間有雄才大畧欲令納土承  
風乃巴氏歸心謬說鷄鏃帙布秦襄勒石虛傳清酒黃龍置吏始於宋均未必狼心頓  
洗分州盛於趙鼎何曾彪性終馴韓愈之請施恩原非得已尹墻之思立埃究屬空談  
爵祿金錢耗盡崇帑帑藏珠璣抵瑁飛來元狩樓船賒錢不入寶人叩杖傳流身毒越  
裳翡翠兩旁京觀之封蒙舍名駒三費南城之築崑崙關外依然九菌風煙安化州前  
仍是三苗瘴癘巴渝協律孰縮銅章水曲獻歌誰通牙節都護何殊畫餅刺史不異添  
蛇歸明官之職僅存都誓主之風愈扇未有鴻慈遠被箚篁依日月之華內御允孚江  
漢鼓朝宗之浪如今日者也茲蓋伏遇

皇帝陛下道凝瓊鎮業峻銅樓舞虞后之干昧谷明都煥彩發軒皇之鼓丹山赤水蜚聲滄  
澗無波晉澤馬山車而薦瑞遐方用享綜前兒任子以呈圖橫卻月於天街已見交州  
送款劃長虹於地脈更着烏藏投戈環海十洲波通太液之水鄧林萬里影交上苑之  
花固已壁合珠聯四表占風納盡麟遊鳳舞八方候月歸琛矣猶以至德無私構乾坤  
而作室元功靡竟闢山海以爲門倘有一民一士之非臣悉屬已溺已飢之在抱惟滋

荆襄左右實爲狁狁窩巢棘道雖開半留蛇窟湘江直山間有鯨波子繼孫承不啻青  
種故物雲翻雨覆幾同白馬齊盟豈無沈芷禮蘭甯忍置之戶外苟或狼奔豕突難容  
臥此榻前是用

睿算淵淳攬九溪於指掌

神謀嶽靜燦六詔於觀燎若熟若生何事伏波聚米臬家某野無煩充國披圖鏡懸玉案  
之峯獠樹猺膝動色日照銀坑之麓嶺花峒竹生風虜已在乎目中衡遂拆於俎上特  
間北門鎖鑰專司南國旌旄祇期遠服還安非曰窮兵武黷馴如桓誕自當錫以三章  
驚似單程廼始加之七萃無爲殘同薙氏擾此青衣痴比虎侯傷吾赤子煌煌

寶訓渙頒鴟鵂樓前矯矯干城敬布豺獮穴裏雞羽刷黃沙之露徼走滇池馬蹄騰白帝  
之雲諭傳巴蜀恩威並播蠻蠢周知赤棍白衫乍聞言而拍手東瀛西珥欣舞袖以歌  
風雕題鑿齒之倫賣刀買犢魑結羣桶之輩束髮垂纓八百雄關莫不焚其壁壘二十  
巨姓爭思範我甄陶詎有落土遺頑敢效苗民逆命恃七羗之險隘羊假虎皮弄九互  
之波濤鳩猶鷹眼於是張我兩翼整我三奇揚

天子之威靈展

大君之方畧驅虎而摧堅百二搏鯤鵬而擊水三千進據虎頭已奪廩君之氣直趨龍尾遂  
沈鼈令之屍飛頭襁負以偕來掩鼻壺漿而並出日鳥與風禽胥繳楚粵天開長鯨暨  
短蜮咸芟滇黔日皎跳染既靖異種爭趨前列行頭欵關送質後隨繡面抱子陳情卉  
服皮冠希入鳩班鷺序鄉公土日冀紆紫綬銀章合折腰咳首以皆同革棹尾斷頭而  
就節齊歸日出之主紛來星使之庭養印腴田繪冊圖於疆吏蘭干細貯奉土物於峒  
官邇迺俯協情仰承

廟畧別其族類按厥方隅畫埜分州不問大章大亥濬隍築埠無遺爨西爨東朔稟阿驢  
莫習山中舊厯阡開永順誰爲世外遺民桃榔樹裏扇調風南東若繡劍荔官中飄化  
雨禾黍如雲農功既修於米貼鳥蒙水耕火耨流官復建於魯魁羅猓玉律金科除茲  
叩石私銜復爾提陀舊業清平錫爵無庸甲戌之元侯歸義更名悉隸戊巳之校尉錦  
袍華帶初加羅鹿之身格磔鉤轉尙卷山雞之舌炎峯凍磧徐通尹政詩書紅紇紫姜  
漸染鄭純德化比魚遊靈沼洗舟江白水之污似鳥入上林避丸股七蕃之瘴凡此偏  
荒驕子久自棄於方軫圓窮何幸中國

聖人復見收於仁羅義網同文同軌越方徧置螯牛來享來王漢使何勞獬豸吹蘆笙而櫛

銅鼓酌虫酢以慶堯雲詞金馬而記碧雞持番呪以祈舜壽異蛤神膠之貢紛委鸞階  
白狼爨木之章允諧鳳管橫山北上告家奠以如歸合口南還喜長安之不遠從此義  
錢口賦司農添蠅戶之書蒟醬椰醪膳宰薦龍家之簋衣鉢蓮開千葉香滿瑤池留求  
果結十株青涵桂館數尋最屬例尋丞相之碑萬里江山永逸觀音之句防風已集何  
殊後至行誅稗海爲家豈待指南遠導是皆

廷謨默運允爲聖武旁昭千古無儔萬年有覲臣等才非毛穎志類終繻乏陸賈之奇謀腰  
餘一劍想狄青之偉績襄澀百錢若令載筆行間亦可勒銘劍閣設使從軍戲下或期  
立柱珠岩比望昆明目斷石鯨鱗甲南通靡莫心隨天馬蒲萄當此朝驩定筭之辰益  
切負弩乘車之願伏願文超虞德武邊功御後殿以總八蠻不廢賈生之末議坐明堂  
而緝百濮常思諸葛之三言頑風譜作弦歌鶴柘蠶叢并隸華胥之國兵氣銷爲日月  
騶牙象齒齊輸大帝之庭由南服以推朔方金甌永固自東漸以迄西被銀甕常輝不  
獨蜃戶馬人奉明月以繞狀共緜地久天長之歷抑且烏荒狼蠹占青雲而得夢同歸  
剖符緝瑞之班矣臣等無任瞻

天仰聖激切屏營之至

撫苗碑

鄂海

我

皇上智勇天錫自臨御以來仁育羣生義征不諱德威遐暢遠邁前古始者三藩肆逆台灣

負險

皇上神謨獨運指授方畧決機萬里以次削平及噶爾丹跳染沙漠特動

法駕三征不庭元惡就殲脅從率服由是薄海內外盡入版圖航浮索引重譯稽首獻見

於

闕下者皆書傳所未嘗紀自生民以來未有功德若斯之盛者也惟紅苗僻處南服虞夏

以來未聞向化依岩據谷時出為民患康熙五十年臣鄂海膺

命總督湖廣披圖按籍以鎮草邊墻宜用舊修築繪圖奏請

皇上睿慮淵深謂如爾議未足捍禦紅苗

命同提臣巡撫會勘臣鄂海於九月己酉偕提督巡撫總兵諸臣自五寨司城北出舊邊牆

馳入苗地庚戌至毛都塘苗人吳老鉄等率其子弟導迎申述城款壬子復自司城至

乾州苗境宣

上德意徧諭諸寨渠長羣苗踊躍忭舞咸頓首曰

皇上如天覆幬物各得所苗人雖阻絕荒遠然戴高履厚何敢自棄皆願爲編氓輸賦供役以奉

天子於是本年十二月至五十一年五月毛都塘五十二寨計戶八百有奇計口三千一十有二相率至武昌歸順自六月至八月盤塘窩生苗八十三寨計戶六百八十有三計口三千一百八十有二皆後先來歸臣鄂海節次奏聞

皇帝曰惟紅苗憑恃險阻從未歸化今既各輸悃誠聞風慕義朕視天下內外一體也地方文武諸臣務體朕懷今皆安土樂義咸遂生養從容化導教之禮讓如有侵蝕擾害者督撫糾察以聞臣竊思自古以來未能馴服之苗乃不耀一苗不折一矢而絡繹內附願同蒸黎皆由我

皇上天授神武赫聲濯靈有以攝服羣苗之心而又湛恩汪濊浹淪飢故一旦革面洗心與萬邦黎民共沐

聖化自今伊始凡三楚文武大吏暨郡縣令長其保護勸導輕徭緩刑以仰副聖天子勞來匡直之至意而苗民世世子孫畏威懷德長爲良民我

皇上神功駿烈永永無極是宜勒諸豐碑昭示萬世臣鄂海拜手稽首而作銘曰  
帝德廣運澤被萬方顧茲鎮筮與苗接疆率梗莠順僻在要荒  
皇帝仁聖不勦而撫苗悔前非式歌且舞相率來歸永奠禹土

辭祝

天子壽視此豐碑與天地久

二首今採



永綏賦微

花園賦

以柳暗花明又一村爲韻

湘潭秦關

彭宣慰郡印家傳邊陲世守花古四時園規十畝午衙排罷不勞案牘之形丁檻倚來時課栽培之手六里都成香國長官恍住仙鄉三苗共陟春臺勝境幾忘蠻藪豈誇富貴乃種鼠姑自適行匪頻依鴉舅城堪名錦何須萬樹芙蓉塢盡蓺華奚止五株楊柳當其度陞規方遙瞻近瞰命監督工平崑鑿礪築垣短兮結籬長植春濃兮栽秋澹此地有崇山峻嶺定多種樹者流若時過寒食清明詎乏賣花之擔鏡潭瀉芭蕉之影淨綠絕塵粧閣迎李梅之春浮香動暗則有如玉簪之插品特華而金帶之園兆曷嘉而若者仙子若者佳人貌無瑕而或爲尙書或爲學士蕢靡加而况虞春風遞信夏團傾枕移來砦上出不一葩而看秋出塵欸冬脫俗取出峒中尙多芽而看他剖得連環算不盡的雌雄之樹想到開成並蒂賞無限歲娣妹之花夫此園也通茆山之佳氣映茶洞曰敷榮汲取蝦蟆口路達鳳凰營葉互枝交既生香之不斷水清石瘦更奇趣之橫呈雖殊栗里村中高人託跡却似武陵源裏漁父通名倘與外言疑是虛無幻境自非親見安知別有雕甍館起茶蘼之架欄遮芍藥之棚如論選妓當筵未免桃將顛妬若

問舒華映樹豈徒樗照眼明彼夫洛陽甲天下之觀梁苑丁關中之富桃李擅其芳  
杷挺其秀樂爲所獨溫國攸居垢也能離劉生曾購何如此之白嬌黃嬌紅肥綠瘦  
逕合名香谷宜曰繡消夏水涼臺畔羨斯土宜詠宜觴尋春金子洞邊令嘉賓思來思  
又第想其園丁掃徑惟供姬侍之娛各子來游罕遇風流之吉倘是華憐子美搗管成  
唸園屬辟疆遊人舉筆則北河流水可埒浣花之溪楠木成材不數蒙園之漆何以彭  
家衆卉久誇南國無雙自從孔氏一遊始占東風第一迄今芳徽已渺勝蹟猶存渚畔之  
鷺鷥閑立隴頭之鸚鵡能言魏紫姚黃仍留遺種文甄繡石尙認顏垣矧逢聖朝覃敷  
德禮廣布威恩迅掃蠻烟和風被夫卉木全消瘴水甘露漚彼籬藩偶從絕徼遨遊快  
覩靈葩瑞草竊幸邊城賞玩欣瞻綺陌芳邨

摩崖銘賦

以頑苗入化絕域雲開爲韻

巴陵龔立海

維聖主之撫馭兮訖聲教於九寰維良臣之懋績兮垂勳勩於百蠻當三苗之梗化兮恃險阻之谿山奉三蠹以撻伐兮辟醜虜之津關旣草露布於鞍首兮復鐫盾墨於屏顏壁面縣以聳峙兮管手搦而援攀羗百靈之効順兮假神道以警愚頑昔周鎮軍之開闢六里也仗節旄而專征討兮率師旅而赴岵嶢威令行而軍聲丕振兮韜畧具而規畫有條強用剿而燬巢焚宅兮弱用撫而稽時折腰蠻烟斂而肅清四境兮瘴雨捲而景耀重霄人幸安磐之可慶兮地有靈水之來潮迺倣希範之銘銅柱兮於以壽貞珉而鎮撫有苜爾其嶽巘屹嶠相陰陽以作邑兮崆峒嶠嶠憑下上以拾級兮竈飛蛇舞洒金壺之墨汁兮鐵畫銀鈎摸玉堂之寶笈兮鸞然之績石闕之勳重奏集兮牧童之敲牛角之礪俱弗及兮視孟陽之題劍閣匪沿襲兮比武鄉之渡瀘水同深入兮彼夫京觀請封茲則非如佐夫霸也林鐘擅作茲則非如力出借也訊馘獻囚曾是類而曷馮也推心置腹更無虞而無詐也巍巍者崖功不翅特出而凌駕也皎皎者銘業與之共遊夫光化也則見將軍之溪清波激兮仙人之崑靈氣洩兮刮垢盪瑕似莠苗改絃易輒兮倚刀較尺似良苗砥行礪節兮伊誰之力兮非常之烈兮摩抄片石字亮雪

兮摩挲幾紙蹟光潔兮憂鼎商盤堪埒列兮漢碣秦碑遜卓絕兮客有臨崖而撫摩者  
曰二水滌洄兮萬山崩水綠山青兮元老壯色築城浚隍兮勞精渴力固我金湯兮  
潛消反側告厥成功兮曾毫吮墨剔薜剗苔兮大書深刻椎髻惟裳兮花紅白黑行豔  
於周兮共戴一德鑿井耕田兮出作入息荷納福林兮仗登壽域於鑠夫土地辟兮竹  
帛書勳邊陲肅兮金石著文異從事之書碑兮文成破體擬桓侯之銘斗兮字映斜曛  
鯨兮靖霧狼兮匿氛神兮動聽鬼兮駭聞謳謠兮士女感泐兮民軍十六字之題兮韻  
長節短千百族之福兮惠沐惠熏疇忍磨以沙兮並不霾以雲爰爲之歌曰危崖百尺  
半縈苔壁上遺文跡漸隕逆命於今胥格命安邊有策是良才又歌曰天上將軍仗節  
來去時曾動百蠻哀摩崖銘句千秋在毒霧真霾一掃開

永綏詩徵

舊城十景詩

梅井泉甘

漢陽段汝霖

泉湧香甘梅瓣同同歸開闢此城中淵淵不假人穿鑿一井資生萬井功

荷池香泛

荒烟蔓草衛城基猗儺香生夏日宜宋代園亭湮沒盡崇山猶賸一荷池

西山曉霧

占斷山巔陰與晴衣冠早起望西城雨憂潮涇乾憂稼曉霧惟祈夏月生

東閣晚鐘

嘹唳鐘鳴寺閣東晚風遙送暮烟中一聲撞醒三苗夢始信元音識聖功

聖水來潮

官衙岑寂對橫琴萬籟無聲香印心何處鳴雷從地起小西門外有湖音

靈嵩瀑布

龍罩噴水下龍潭百丈珠簾雨後愁一隙源頭休薄視直通舟楫濟湖南

排樓映日

雙雙螺髻峙雲端，疊嶂偏宜夕照看。  
幻出蜃樓山市裏，可知陸地亦波瀾。

文筆凌雲

點化愚頑掃盡兇

朝廷設館細陶鎔，他年定叶浚雲兆。  
景運天開文筆峰。

五指排空

五峰如指插晴空，造化由來布置工。  
應是拏雲伸妙手，高攀丹桂向蟾宮。

三台拱秀

拱照奇峰筆架排，太微垣裡映三台。  
公餘翹首東南望，秀色參天入座來。

新城十景詩

汎濫春流

甯鄉黃本驥

僂體能資灌溉功，塘名雅與古詩同。  
月涵鏡面雙奩啟，春入城跟一綫通。  
荷鋪定逢源，左右穿渠應遍畝。  
南東清漣盡洗谿，山陋人在廉泉讓水中。

谿橋新霽

雨後谿光浴曙暉石橋橫跨彩虹飛桃花浪湧紅千片柳樹陰濃綠四圍賣酒人家臨  
水住裏鹽邨女趕場歸采風欲乞荆關筆畫遍漁郎舊釣磯

灘聲應雨

戰場鐵騎海門潮似此灘聲五夜驕激石銀濤秋滾滾打牕黃葉雨蕭蕭山城鼓角增  
悲壯水國笙鏞破寂寥谿漲不知添幾尺曉看綠暈上浮橋

古洞藏雲

巨靈僊掌擘何年寶珞珠瓔面面懸石逕僅容雲出入洞門常有水盤旋暫移枕簟消  
長夏偶與漁焦話舊緣好事若逢劉子驥此間應不讓桃川

南澗烹茶

涓涓澗水碧無瑕抱瓮人歸石磴斜文火細燒霜後葉活泉新試雨前茶閑携野客烹  
雲液戲遣山僮汲玉華品味應居三峽上著經桑苧漫相誇

夕池罷釣

捲餌投綸邇夕陽三三兩兩偶成行歸途到處漁歌起埜店誰家酒旆張烟水一竿閑  
歲月溪流幾曲古滄浪居民不羨莼羹美釣得鯊魚尺半長

白泉沃雪

是泉是雪湧滔滔噴沫飛流作素濤百尺銀龍蟠水府千聲縞鶴撼晴皋日光盪漾冰  
山動雲氣模糊玉壘高欲把長竿投白水漩渦深處釣神鼇

飛瀑濺珠

鱗爪擎空氣象殊傾將萬斛醉龍珠霏霏浪似銀潢瀉閃閃光疑具闕輸產去知非從  
蚌腹穿來漫擬拾蝦鬚青山白練工名狀好向佳篇入畫圖

山閣朝暉

傑閣凌虛縹緲間蒼茫烟鎖綠痕斑朝暉斜掛暉曠日曙色遙分面面山露浥庭前空  
翠冷風清檻外野雲間塵寰相去無多路誰向層巒叩曉關

江樓夜月

小住憑臨物外天松風花雨兩茫然懸巖孤寺停雲少近水危樓得月先窻面含將千  
頃白波心湧出一輪圓箇中好景誰人識烟銷城頭俗夢牽

和楊二雍度盧峰書院四首兼柬陶適齋明府

金匱 徐廷棟



憶昔曾行處山城傍水隈入花多掩映臨竹可徘徊是產球琳地應饒杞梓材十年勞  
夢想聞憩子雲才史記文翁治風流復在今明犀移俗手越治育才心遺愛存歌芟前  
徽紹惜陰緇衣情更切片玉璨瑤林離騷著經後此地賦才多蔡或逢焦尾歐應識太  
阿樹須宜性種鏡藉苦功磨愧乏明珠贈芻言謂若何我亦承聲教官衙卽講堂相期  
化蠻語漫擬溯前芳山有幽蘭秀溪多杜若香盧峰相望好歌詠共時昌

壬午新秋永紱署齋和顧雙溪見寄原韻

支頤終日對嵯峨漸覺新涼上碧蘿陳夢已同紙扇卻幻情休閒蜃樓多虫吟石壁踈  
踈雨月墮金專灑灑波春色不隨人共老時看花影拂簾過

蠻山萬疊獨徘徊何必衡陽鴈始廻詎有琴音餘爨木喜無弓影倒銜杯烏衣雨過明  
殘照宵織宵深響綠苔最是官齋清絕處一爐香縷斷塵埃

不怕花羞強欲簪惜花常自繞亭林已無絳雪元霜分難忘清泉白石心苗鏡笙笳隨  
客聽星期瓜果及時尋離羣已久拋毫素瓊報聊爲試一吟

欲知動息近何如公退蕭然似野居解意園花徂暑後勸歸林鳥報更初一囊風月行  
裝薄滿地江湖魏闕踈寄語使君須努力古來循吏幾人書

永綏廳署海棠詩 有序

乾隆庚辰二月予甫至永綏於署東偏荒圃中移海棠一本植書齋前故寒食詩有云最愛夜來微雨過隔簾新種海棠花彼時花僅數點而已未之奇也迨至中秋忽蓓蕾滿枝至十月而紅英競吐歷嚴冬迨寒雨雪交加花日益繁至正月而盛至二月三月而大盛自根至頂如丹沙萬顆爛然耀日夫草木之花以及時而開者為正然或有先時而開者或有後時而開者亦俱以見造物之功若茲海棠先時而開及時即盛過時而仍不凋斯亦偶然者矣詩詠之

領得山城亦足誇曉看紅日晚看霞天公猶為敷勤甚一樹教開四季花  
憑仗年來雨露滋繁花與我共恩私他時蠻徼傳佳話八尺珊瑚未足奇

永綏潮水溪觀潮

鳳凰 劉 豹

萬疊蠻山擁草萊蠻鄉誰信有潮來耳邊獵獵如奔馬地底殷殷欲噴雷澎湃聲高連谷應蒼茫影落裂山開子胥不及經過處猶自鷄鳴早晚回

書彭雲軒司馬永綏死事

長沙 周 鏗

苗具人形有人理好官亦解憐其死永綏圍城聚眾呼急曰黔苗非楚耳先生作官數

十年到處名以彭青天自我粉榆及苗徼口碑同說無不然乙卯正月黔苗亂楚苗未  
熾易解散明公武夫徒用武先生同出遭厥難其時僅挾三百兵貿然而出無一生公  
時從容死就義淑浦一傳最分明少子從戎最純孝仇切戴天刃可蹈無何兵潰亦死  
之地下國殤應共笑讀聖賢書何爲乎父忠子孝理不殊猶記師有自壽語果然大事  
不糊塗公自壽詩有大  
事不糊塗句我昔遠得公子札歷言苗情曾不恕檢存遺體致公子歸正  
首邱葬東粵乃知遺愛苗亦同官好德厚論至公不然倉皇致命者誰裏馬革兵燹中  
會爲上書訴清節當事諸公憐義烈嘉忠子孝有同心直以死綏陳殿闕喜聞陰子有  
殊恩雖死不死褒忠魂豈知藐孤亦摧折斃猶有名公孫我爲先生門下士聞之涕  
泗不能止亦知守土死宜然瞻望門牆情曷已明德之後有達人此理不夾同屈伸遙  
念鳳雛隔嶺表何時健翮騫高雺吁嗟乎何時健翮騫高雺

吊楊烈婦七古一章

楊瑞珍

從容就義者爲節慷慨捐軀者爲烈卽是二者而權之孰難孰易當自別就義近中庸  
捐軀由激切古人以此矢精忠柴市方能完碧血慷慨楊烈婦似近從容列生來抱幽  
姿素志勵冰雪貌雖豔於花腸還硬如鐵十載伉儷情一朝成永訣生既與同衿死寧

甘異穴誓以身殉夫矢志何其決上不念衰親下不恤孤孽活然而長往此中無曲折  
不孝與不慈一任肆詆訐詹詹小儒言聽之總不屑吁嗟乎豹死留皮人留名此語會  
聞彥章說千古烈婦忠臣同一轍

吊楊烈婦五律二首

廬江 劉禮章

義烈昭千古閨房重大倫捐生無顧慮矢志本貞純早託翁姑養旋拋子女身九原期  
聚首肯作未亡人

其二

瞬息辭塵耳羣推志節高情原甘醜羽命豈等鴻毛行比冰霜潔心如鐵石牢幽光甯  
待闡彤管式奇搥

吊楊烈婦五律一首

瀏陽 鍾應先

晚嫁傳佳話如賓敬不違白頭悲未遂黃土誓同歸一釧留兒念雙親仗姊依心肝冰  
雪作千載仰芳徽

吊楊烈婦七律四首

宋世熾

斷臂投縵信烈哉今人甯讓古人來漫言生死同朝菌久許團圞到夜臺萬縷愁心花

濺淚三春別恨鳥鳴哀從知大節關名教  
弃世猶堪動溯洄

三鱣堂前泣舅姑春寒怕聽夜啼鳥  
一官如夢心同冷兩地牽愁眼欲枯  
空冀餘懽承皓首忍忘大義惜微軀  
憐他一片牕前月難寫淒涼絕命圖

宵深蕙帳不勝寒遺子髻齡百慮攢  
十載恩情歸蝶夢三更燈火憶熊丸  
捐生漫道拋愁易拚死還教割愛難  
最苦牀頭小嬌女傷心含淚幾回看

堅貞獨抱歲寒姿雪壓霜侵正此時  
完節祇存真面目成仁不讓古鬚眉  
三生緣莫今生了一箇心能幾箇知  
青史何年標姓字好將彤管播風詩

郭孝女剪古醫母歌

楊瑞珍

君不見漢代有女曰緹縈上書代父出  
至誠又不見勝朝有女曰衛摯割肝醫母當藥  
餌芳薇先後世爭誇誰歟繼者郭氏姓郭氏生來有淑德  
早歲便能爛內則依依孺慕本性真晨昏定省無歉仄  
癸卯之歲疫流行阿母一朝疾病生涼藥誤投悔何及  
舉家飲恨泣無聲平日髮膚非不愛此時但欲將身代  
抽剪剪舌血淋淋煎湯醫母何慷慨精誠一念可通神  
飲罷沈疴頓去身閨中弱女能如此愧煞衣冠隊裏人  
濡毫咏罷新詩句信有鬼神相呵護不爲孝女歌一篇  
傳人幾等草頭露吁嗟乎歲月茫茫似水流

欲仁得仁復何求古今不少名門媛誰似秀才之女孝名萬古留

弔熊舜俞鎮軍殉難丹陽

丹徒 丁紹周

烽火東南半壁連渡江先着祖生鞭

渡江以來戰功最著

紅山破賊饒雄畧

攻破紅山賊壘二十八座

白面

談兵正少年已見繁星齊墮地

殉難前數夕星隕如雨

忽驚一柱不擎天紹勳知有奇兒在應使

前賢畏後賢

將發永綏就試長沙寄潘竹軒文

胡啟文

西上巉巖道路艱憐君作客鬢毛斑秋生落葉寒塘外人在浮雲古戍間別院風清朝

磬發

永綏產磬石

孤城月上慕潮還

潮水溪在城西

尺書寄我知何處帆轉鴻飛六六灣

吊王品一閩戎粵東殉難六首僅錄其二

豫章 王先春

月社花壇與最豪肯容賤子說風騷

公性愛風雅于讀書人無不虛懷延納每見春詩輒擊節嘆賞

此情彈指都如夢

爲

國捐軀更覺高九塞荒煙埋戰骨三春殘雪凍征袍昭忠廟裡靈魂在兩手猶持殺賊刀

五次揮戈破虜圍獨騎駿馬逐斜暈

公親臨行陣五次矢石交攻獨樹功績

軍民竟號爲飛將矢石何能

上鐵衣生不封侯緣數短死雖得所嘆才稀擬將十萬強弓弩射向潮頭靖逆歸

以上原文

洗雲亭

董鴻勳

一碧天空萬景清小亭六角恰初成圓方取象乾坤在體物平均豈競爭

清沼

流泉汎濫自西城龍口通來一脈清湮塞何年今始暢好同靈沼在虛明

五嶽真形圖

剔蘚扶岩再作圖真形五岳紫囊鋪平生足跡遺嵩泰石磴時登萬象敷

志樓

志成恰值峻斯樓諸吏從容膳寫優漫以昭明相比擬一篇跋語一千秋

山明雲淨

當軒幽敞復前工翠黛煙霏望不同三四平當題筆在山明雲淨象昭融

奉仁堂

奉揚大吏有仁風日坐斯堂民隱通性子個中仁自具莫言流水任南東

七律二章

平江舉人黃中禮

八區靈秀聚中州應運生申及九秋雲接壽峰通嶽氣雨分畢路潤河流萬言文僻王

憐子

公腹笥博而能洽下筆萬言

三策名高賈誼籌恰趁蓬萊恩宴後湖南新橘足千頭

佳期豔說秀公生又向湖州賀水晶龍餞長春趨玉殿新開不夜是金城

新設朱亭城以公主之

公增南國詩千什我壽東坡笛一聲

公修永綏廳志適已脫稿成書甚速士林欽服

菊酒萬齡同洛下蠻花犵

草盡稱觥



續修永綏廳志跋

行省府廳州縣之志上之與國史相維繫下之爲家乘之權輿典至重也敝族今年續修族譜楚遠宦未能躬職其勞惟

聖天子新基特立鼓舞百昌新政之興不知凡幾然必

宸謀碩捕輾轉而底於成卽如永綏廳之有志梁公璨與段公汝霖特剋其始袁公廷極用圖厥中周君玉衡與王君起銜并集其成牒經五易雖經營慘淡遞衍日新畢竟歸咎於開闢太遲歸化不早經數千年崇山蠻花犴草一旦融化於雍正九年之光天麗日雖多方採擇備極推詳而自天下有心人見之未免有仍舊新增之感也宣統元年開州太守董公蒞任斯土公餘之暇檢閱舊志區區僅六卷之多不禁油然而心悸穆然長嘆矣前此任古丈坪時手創廳志十六卷獨力草創僅兩閱月而告成今觀於斯無論版圖之寬展人民之衆多或相倍屣卽此數萬人之忠孝節烈挺生其間光爭日月者四十餘年間又豈少哉况民苗雜處文教初興未免有缺如之嘆迨至上科會試張稱達以進士鼎立行間卽文教之盛可見於是

董公於奠定城郭而修補之於安輯人民而保衛之於捍禦災患而預防之於化導學校

而振興之且於此條特開生面攷核詳明於政治之中而增光道德與夫通往來以助  
津梁達文告以置郵傳勸農桑而足衣食厚人心而正風化者靡不體

聖主之宵旰勤勞俾下屬而同風一道彈精竭慮固見天材敏絕而精力彌滿一以貫之自八  
月十三日起手至九月初十日完竣未逾月而成廳志三十卷八九十萬言聲明文物  
臻上理是不僅爲偏隅之紀載使已也呈諸

學部徵文攷獻不綦可以廣大一統之規模也夫

宣統元年秋九月十二日五品頂戴歲貢生署理永綏直隸廳訓導古龍城曉湘氏謝  
光楚敬跋

五十初度自序

董鴻勳

觀乎天文以察時變觀乎人文以化成天下天尊地卑惟天聰明地道順天德後無疆  
仰以觀乎天文俯以察乎地理亦文也故亦有地文之說剛柔交錯天文也文明以  
止人文也夫一陰一陽之謂道繼之者善也成之者性也仁者見之謂之仁知者見之  
謂之知富有之謂大業日新之謂盛德然則在天之陰陽以爲元氣之流行故曰元者  
善之長也繼之者善也有陰陽而後有元氣元氣流行善端發見其在於人大元鼓盪  
庶類含生善氣旁流人爲秉蔽著於倫物蘊於心體是名爲性著性而善成陰陽之道  
於以昭然不知心之所在是在知性不知性之所在是在盡心盡其心者知其性也故  
凡事盡心是將知性盡心之說不逆詐不億信毋意毋必毋固毋我忠恕之道乃見性  
端戒慎恐懼乃見性真既知其性乃可知天知天之功難矣鴻勳庸下不學其何敢言  
言亦揣擬影響之詞自欺以欺天下後世其何裨於斯道若夫盡心知性則日用行習  
之間苟盡其心焉皆有知其性之發見之時而道原於性知性之一端卽知道之一端  
文王望道如未之見孔子君子之道未能舉全體而言如天地之大德敦化此非浩浩  
其天之聖人其孰能知其真實若夫天地之小德川流則一木而枝幹攸分葉花有序

一蟻而可觀戰圖可見房舍此童子猶知之何論成人然而溝通天人默識心性則其事何由必由於文故天道燦布懸象著明莫大乎日月昭昭之文道於是呈由是而地而人山川草木禽獸人類之流峙發生或生或滅或消或息父子夫婦人倫之聚處離折相親相敬昭昭乎其皆文之昭著故自堯舜闡道之原禹湯文孔以遞集斯道之大成而勳華文思文得皆文也自是聖人之大德皆在於文故孔子之聖爲生民所未有而其言亦祇曰文莫猶人文不在茲夫昭昭著於三才之間者莫不條理秩然文明燦爛然而人之所以立天地之中居三才之末而能以仰以觀於天文俯以察於地理觀鳥獸之文與地之宜則言語實爲之階言語之精至動大地而不託於文字則聲銷響滅堯跖亦有何分故文字之文固與天文人文地文以溝通之具也自天地開闢以來人生其間文字既作精心乃著至性常存天命於以昭然斯道於以率由然則文字之文固言道者所以介紹於天地人之交互旁通而司土地之官仰維

### 天子惟聖憲

天俯念斯民天視天聽蒞政臨民憬然自懼孰非陰陽之所著

天威不遠顔咫尺

昊天有成命如在千里升降

關庭焉自拜印之日經年累日兢兢戰戰任大責重如捧玉如執盈求所以盡心知性以事

### 天事

天子之大臣大吏存心養性必自戒欺求慊若其土地人民政事之故尙未能昭然於心而猥日盡心以知性是欺天欺人以自欺其何以言故茫此永綏而慨然以修志自任所以察人土地政事之實情以期盡心而不敢言知性蓋道之所在在於文字文字之在於盡心心之既盡文字亦道之所形自宣統元年二月初六日接永綏直隸廳同知任拜其印而皇然如見

觚稜之日影蒞政事而皇然如瞻

上台使節之森然臨民人而皇然民胞物與平日空言今何所持亟欲重修前政累修之志以諗時事咨來者察邇言求崇論宏議以推見事理求忠臣孝子節士貞女之實事以爲之表揚用勸人而勉已出示觀風徧諭札於屬吏備弁紳團移咨鎮協告以將修永綏志有所司有所知皆具以告將採列而登於志應者或然或不然至五月二十

五日將動手就其所已得知者不設局不派費不聘人以一手自爲之僅一日而抱瘡疾又蚊甚熱暑訟牘日盈案遂卽日止至八月十三日瘡愈十之八九暑退而蚊亦漸息念此事未了心終未盡卽無以見斯性亦無以見斯道乃起手著之至今九月初十日而書成爲卷三百數十萬言一月而將滿明日勳與妻李恭人筱鸞五十初度恭人同生於咸豐庚申九月惟其日自十一至十五爲少異耳五十之年合則滿百白髮漸生斯道茫然上念

國家之運會下維民生之大局仰思累世詩書仕宦之遺澤俯慨兒女教諭之艱難百感交集中夜徬徨其於斯道之歉仄也至矣而斯志方成不擾民間一文得書盈一二尺可以觀政可以示今而遺後於道之本來雖未有知要亦陰陽鼓盪元化流行使勳得以一月之間以成煌煌巨帙恭人持家有道教課兒女俾予於臨民聽訟之餘不問家政得有此暇日以成此志亦足壽已古之爲書者多有自敘今志適成卽以此代以存於志而各目分繫以詞如下

惟天生民厥有秉彝界域於上人類派支周官星野乃見厥始仰視列精長沙一子志星野於天文門一

大化流行陰陽不息爲暑爲寒歲公以濟維此六里在氣之和禾黍芄芄鼓腹騰歌志  
氣候於天文門二

作善降祥不敬惟焚洪範五行乃自躬開繁庶永民帝惟鑒止洪水至今難稽厥始志  
災祥於天文門三

茫茫禹甸屬我

大清越八十載六里功成

帝有恩言以育以亨雍乾嘉慶大猷是經志建置敬冠以

繪音恭紀於地理門一通前目爲第四

畫野分疆在昔黃帝惟此巖邊豈甌脫地以圖堪輿以輿測圖其在於今再繪紛鋪志  
輿圖於地理門二通前目爲第五

固國之界不在山谿王公設險政治一齊其惟疆域豈可無分民苗村寨道理適均志  
疆域於地理門三通前目爲第六

山川奠定廳域以成臘耳山脈酉水源清是用祥考以詔於今按圖索志毋閱爾音志  
山川於地理門四通前目爲第七

形勝之志是云扼要得其機警風馳電掃永綏邊土得形勝先敢告司民於百千年志  
形勝於地理門五通前目爲第八

擊折重門暴客是禁疊隘重關甘棠垂蔭王公司馬壯肅分巡上資

國帑惟功力均志關隘於地理門六通前目爲第九

永有良田萬千斯箱人稱樂土六里陽陽惟水之利梗稻之香治壩持鞭爲世馨光志  
水利於地理門七通前目爲第十

津之梁之舟人之子山水阻深臨流無止永七百里水道縱橫官欵屯義水險以平志  
津梁於地理門八通前目爲第十一

步站舖遞以通文書其在於今文具存諸撥改書夫專差健足郵筒設局轉馳更速志  
舖遞於地理門九通前目爲第十二

寸土歸公無買賣處義塚官山爰茲立杵白楊蕭瑟一樹冬青萬里攸居是程是經志  
義塚於地理門十通前目爲第十三

古有陳迹爲今之積是考是觀行政調劑人世之間俯仰已非其毋記古而賦式微志  
古蹟於地理門十一通前目爲第十四



太史陳風曰惟政教習俗相沿其何以傲永不殊異風俗大同賓婚喪祭遄啟毋蒙志風俗於地理門十二通前目爲第十五

六里之民三代之直物則民彝同茲資質化而導之詩書仕宦奠麗至今永其無患志原文苗峒今增六里語言於地理門十三通前目爲第十六

城以爲治堡以保民其在嘉道土木年甸礪樓卡座以鞏以飛於惟百載前烈光輝志城堡於營建門一通前目爲第十七

學校之設得請於乾學使減額其與何關屯苗義館大建學堂永綏局面總赫有光志學校於營建門二通前目爲第十八

壇廟之建報本樂生國有所繫人心息爭弈弈赫赫永有馨香敬恭齊宿神其依鄉志壇廟於營建門三通前目爲第十九

公署官廳卡局兵房義屯廢厥皆曰公倉育嬰養濟以及兵塘是皆原附屯倉加詳志公署於營建門四通前目爲第二十

比戶編口未改土先黃冊停造白冊歷年以今衡昔戶口猶岐有司之籍徒見文辭志戶口於食貨門一通前目爲第二十一

劉晏加賦先養戶口口率出錢力田在宥

國不加賦丁入於田七十二石以迄千年志田賦於食貨門二通前目爲第二十二

大塊環生百產精華豆麥之雄秔稻甚佳繁滋戶口以賦於國爰詳說之農圃取則志物產於食貨門三通前目爲第二十三

兵備所先必在邊疆乾隆嘉慶我武維揚綠營裁次惟此存留敢用詳考備而無憂志兵制於武備門一通前目爲第二十四

九衛屯田行於貴州乃仿其法永用無尤開屯置弁兼以士兵同心敵愾志作戎行志屯防於武備門二通前目爲第二十五

前車之覆用鑒後車前有勝算著書兵家

宸謨公望曰勦撫然是用詳誌以垂千年志勦撫於武備門三通前目爲第二十六

文謨

武烈官制爰定設廳鎮協邊氛以靜屯土碁列如古公侯新制學業以宏遠猷志官制於秩官門一通前目爲第二十七

職官有表爰指其人按年分繫以責其身原文與制乃分目次爰舊貫仍各驗其事志

職官於秩官門二通前目爲第二十八

立政惟官用絕其畧生者不傳惟古之畧或丁兵禍或際承平各盡乃職以爲保衡志政畧於秩官門三通前目爲第二十九

貢生援例軍功行伍統之選舉名位以傳其實三途我

朝併用乃立新表何非材貢志選舉於人物門一通前目爲第三十

義方之訓其曰有子朝拜

鶴書名榮鄉里爰列表章以示仰止其有脫遺各自奮起志封贈於人物門三通前目爲

第三十一

忠裔之封世爵世職原文難蔭乃不如實另易表名以勸後人黃封碧血惠及爾身志難蔭於人物門四通前目爲第三十二

忠臣烈士死爲國殤招魂楚些木主淒涼乙卯之變節貞孝女接踵表聞以承

天語志忠烈於人物門五通前目爲第三十三

惟孝友于人紀人綱明發不寐篤念倫常惟庸德言以爲世則鄉族稱賢乃光於

國志孝友於人物門六通前目爲第三十四

切問近思乃有篤行於惟君子德薰義浸風起斯人允茲典則閭門之間爰立人極志篤行於人物門七通前目爲第三十五

仗義疏財以爲國家扶危濟難貧惠維加敦行如此乃厚人倫載紀於志其惟平均志義行於人物門八通前目爲第三十六

文章苑囿是有聞人宰官豸繡以榮其身永自改土號爲文明用志斯列以見華清志文苑於人物門九通前目爲第三十七

爰有女宗以成坤道節勵冰霜精神獨到孝烈賢淑俱爲世則端牘陳詞旌揚於

國志列女於人物門十通前目爲第三十八

六藝之文包羅萬有上自

朝章下迄物阜莫不具在人心法則式用編垂用錫爾極志奏疏附列各類於藝文門二

通前目爲第二十九

叢談之篇以紀逸事中有理詞典要文字特爲一卷以完此編丹心顏色永以千年志叢談於義文門二通前目爲第四十

自跋

凡爲永綏廳志三十卷計 十萬言自宣統元年八月十三日起手就原文六卷之書而重修之至九月初十而書成菊花滿頭重陽佳節閉門謝客而寒僚來止五十初度適在此志之成之前之後一日合以六月二十五日曾動手一日將一月而未滿自古之著書者未有如此之速者而典制之文經籍之誌謠俗之詞時流之著無不旁搜並覽目閱手書而心裁之文成而不加點皆如宿構在胸借書於手一切體例目錄皆係隨時編纂因文字以爲文字因體例以爲體例而稍有變異者不得已而後然者也日盡數十紙其樂陽陽繕清僕人寶坻仇森古陽劉苒鎮筇劉琪皆與有微勞者并誌之以見其實時重陽日辰刻先志成一日跋

自評

自三代以降政治日紛人百其言家異其術推原厥始道術之裂是以致政術之歧然自孔子沒而大道隱七十字亡而微言絕漢唐宋元明

國朝諸儒先生三代之後闕里之流未沫張皇補苴以見於政事大則致百年之安小亦致一方之平蓋其於道雖有大小偏全之不一而兢兢保守恐其一日或墜者如持玉

永綏縣志  
如捧盈渺千載而一致集羣賢而一心乃至近年破固有之範圍極人倫之異說自洪水猛獸楊墨鴉片之禍又一大亂矣鴻勳此志不第爲永綏計而爲中原計爲中原計亦適爲永綏計永綏之民唐虞時雍來格之民

率朝仁漸義摩之民三十卷中正義大旨守先待後尊

君親上燦然倫物以養以送以康以平障狂瀾而東之者也

繕 吏 員

劉錦棠 孔廣勝 曾子培 周錫森 周子欣 龔性初 胡振玉

李受釗 鄧先炳 何昆耀 楊德炳 鄧守貞 錢慶華 饒德明

鄭代鈞 向明惠 全寬寬 楊德榮 彭源斌

永綏廳志資費

花翎知府銜署永綏直隸廳同知 奏授長沙株洲撫民同知董鴻勳直隸開州人甲午副榜不設局不聘人不捐費撰稿實省民間銀約二三千兩

書成清繕飯食紙筆檢刷各費卽於現有公款節省籌提亦不派費民間一文文武官吏兵丁一文實爲民不知役士紳無擾